

Louis Astruc

Li Caciò



C.I.E.L. d'Oc

Centre International de l'Écrit en Langue d'Oc

3 Place Joffre, 13130 Berre L'Étang

<http://www.lpl.univ-aix.fr/ciel/>

Louis Astruc

Li Caciò

Recuei de pouësìo prouvençalo

**Paris
Editeur Auguste Ghio**

1884

Li Caciò

A ma pauro maire, Naneto Astruc

I

LIS AUBENCO

A-N-UN AMI

Es bèn verai qu'es tu moun mèstre
Dins lou parla de l'Art divin;
Qu'es à tu que dève de m'estre
Abéura dòu meiour di vin.

Paure pelegre, caminave,
Ah! la routo èro grando e iéu
Ere soulet, e m'enanaive
Aguent au cor lou fiò de Diéu.

Lou sòu brulavo; dins ma tèsto
Lou soulèu tancavo si rai;
A travès la pòusso terrèsto
Mis iue cercavon lou Verai.

Car m'avien di: — Sounge, la terro;
Car m'avien di: — Fum, l'amista;
M'avien di: — Fourtuno, misèro;
E pièi: — Bèn plus aut fau mounta,

Jouvènt, amount, luen, aut, dóumino
La Bèuta que cerco toun cor,
La trouvaras, parte, camino,
E n'escoutes pas lou maucor.

Aquelo femo, aquelo angèlo,
Sa terro es li plant estela;
Soun amista's lis amour bello;
Soun or, li vers escrincela

Parte... — E la routo èro peniblo,
E caminave mau-grat tout,
Souvènt moun esquino se giblo,
Ma set cerco un abéuradou.

— O vierginello, o bèuta puro!
Es-ti luen enca toun palai?
Fau-ti qu'à dous pas de l'auturo
Iéu redavale au garagai?

— Pieta, pieta pèr ma jouvènço
Afamado de verita;
Pèr un cor matrassa, clemènço;
E pèr lou camin fa, pieta!

Alor, davans mis iue que vese!
(Estre dous, soulas esperdu!)
Un ome, à moun bonur noun crese,
Pamens, aquel ome èro tu.

E tenié ta mau uno coupo,
E me diguères: — O jouvènt,
Jouino semènço es pas de coupo,
Leissen poussa tout ço que vèn.

— Perqué te maucoura? toun amo
De lassige pòu s'endourmi;
T'aduse un counfort fa de flamo,
Té, béu, o fiué de moun ami!

Prenguère en man la coupo santo,
O, de moun paire, ami tant dous!
E la bevèndo èro cremanto,
E despiei n'ai garda lou goust.

Car autant-lèu l'avé begudo,
Ere à la porto dóu palai:
Per tu, moun amo revengudo
Canto la Bello tant e mai.

Coume antan Giptis la brunello
Pourçè la coupo à soun amant,
La Pouësiò encantarello
Ma tra la siéuno pèr ti man.

Te deviéu aquest cant, moun mèstre
Dins lou parla de l'Art divin,
Qu'es à tu que dève de m'èstre
Abéura dóu meiour di vin.

La Pouësio es uno divo,
Es la Vesta dóu souveni,
E de nautre, à travès li nivo,
Parlo à moun paire, à toun ami!

10 de Janvié 1882.

NOSTO PLANETO

A Jan Tribaldy.

Lou magistre, un ami, t'en remèmbro, ami Jan?
Aprés la leiçoun facho e dicho en galejant,
E lou devé prescri, toumbavo alor sa tèsto
Dins si man, e lis iue tisse, la caro en fèsto,
Semblavo plus n agué soucit d'eici-de-bas;
Sounjava en quauçarèn que nàutri vesian pas;
E pièi quand la pensado unido à la pensado,
Esclargissié si niéu d'uno vivo uiaussado,
Alor prenié sa plomo e magistre, escoulan
Fasien còrus ensèn dessus lou papié blanc.
Aquel ome charrant ansin ‘mé li divesso
Me rappello aro aquéu entourra de príncesso,
Danis lou Jouine, e que plus tard i Courentian
Fasié l'escolo. E iéu, la lucho mounte sian
M'estouno pas: lou mèstre emé sis iue de flamo
Nous regardavo trop pèr qu'un pau de soun amo
Restèsse pas en nautre, e dóu tèms que soun cor
Metié stus lou papié si joio e soun desbord;
Dóu tèms que sout li det de nòsti cambarado
Quauque tèmo courrié, tu sounjaves i prado,
I vendémi saunouso, i daurànti meisoun,
De luen te sourrisien adeja ti cansoun ,
Ti cansoun coulourido i tresor de la terro.
E de noste destin ero la primovèro:
Te vesiéu di pantai suau bela li doun,
Enterin legissiéu Mirèio d'escoundoun!

25 de Setèmbre 1882.

SUS LOU PONT D'AVIGNOUN

A Madamo B. H.

Lou soulèu majestous se lèvo tout-bèu-just;
Amount i quatre vènt se vèi flouta li nivo
Coume de ridèu blanc; lou soulèu es tout nus
E pèr fa sa teleto en Avignoun arrivo.

L'aubo i'a prepara l'escrin de sis ajust,
Piei, crentouso a fugi, vierginello agradivo;
Autant-lèu l'astre s'es enwantela de lus,
S'es courouna de fioc, a mes si pèiro vivo.

Alor, doucamenet, sus lou pont d'Avignoun,
Rèn fièr de sa bèuta, se clino em'abandoun
E se fai un mirau dóu Rose que soumiho . .

Em'acò, se trouvant coumpli lou grand segnour,
Mounto pèr semena l'espèr encaro un jour
Sus li palais e dins lou cor de la pauriho

Avignoun, setèmbre de 1880

LI TRES GALIGNAIRE

A-n-Antòni Regnié, pintre prouvençau.

Pouèto, pintre e musicaire,
Sias autant fraire que rivau:
Es l'engèni que vous fai fraire
E lou meme amour inmourtau

E vosto amanto es òujèt tau,
Qu'emaï signés tres calignaire
A barrula vers soun oustau,
Podon rèn dire li coumaire.

Coume uno auto de paradis
Toujour plus puro resplendis
Quand ié mandas vòsti caresso.

O Mistrau, Gounod e Regnié ,
Qu'es dous d'estre rivau parié
Quaud es Mirèio la mestresso!

PARTÉNCO DI PESCADOU FOUCEIEN

Tablèu d'Antoni Regnié.

(CÈUCLE ARTISTI.)

Dins soun inmènse lié la mar soumiho enca,
Pamens li Fouceien van lèu èstre atrenca
Pér parti. Lou lahut, emé soun biais de ciéune,
Amarra long la ribo, espèro un vènt qu'aciéune
Sa velo encâ plegado; A bord, de pescadou
Embarcon li fielat, de pèis jamai sadou.
Au sòu, l'enfant regardo un que vai carga l'inde
Que dounara sus mar soun abéurage linde.
Au mitan dóu trafé plòu amour e poutoun...
Li Fouceien soun lest, mai lou cor, lou cor noun...
E lou paire, à-mita dins la barco, se viro
Pèr sarra lou nistoun dins si bras, e l'amiro
Lou rèire à barbo blanco e bastoun à la man;
Eici lis adiéu-sias misterious dis amant:
Beissant lis iue, la chato es pensativo e palo,
Lou jouvènt amourous ié, parlo sus l'espalo;
Drecho, uno maire espincho ounte vai s'enana
L'ome e soutu si bais endor soun darrié-na.
Enfin, contro lou mast dóu lahut un pescaire,
Vierge di sentimen qu'an rèire, amant e paire,
Countèmplo, silencious, aquéu riche tablèu
Esperant pèr soun cor un raioun de soulèu.

LOU PESCADOU

A Pau Gaussem.

Lou bounet catalan sus l'auriho, li rén
Emé suen amaga dins la roujo taiolo,
Lou brave Sant-Janen, franc de Diéu, cregne rèn
E 's un rèi, apiela subre sa bataiolo.

A Veniso, à si niue noun bèlo quaucarèn:
Un cop si fielat tra dins la bono draiolo,
Amo que plan-planet lou brèsson à-de-rèng
Sigue un lòugié pantai, sigue l'aureto molo.

Vei sus lou ribeirés douz enfant vermeiau
Qu'uno femeto tèn su 'n mouloun de caiau,
De poutounou, sèns fin , tresano la calanco. ..

Souto l'auro sutran la barco a tremoula,
Lou pescadou renais e sout la luno blanco
Countùnio soun pantai en tirant si fielat.

25 de Desèmbre 1877.

LI BIJOU DE MIRÈIO

Sus l'Album de Mll^e Mirèio Roumiéux.

Bijout sènso parié, quand vesès sout la ramo
Dos agrioto unido em' un liame verdau;
O bessono de l'art, pendènt coulour de flamo,
L'esmeraudo, dirias, poutono lou courau!

Tambèn pèr Mireieto es la beloio qu'amo:
Quaud vai faire la fueio en quauque champ de Crau,
Proche de soun còu brun li pendeloto flamo
Estrihon, e Vincèn tèn plus sus lou carrau... .

E iéu, iéu que d'eici vese, madamisello,
Sourrire vosto bouco, oh! vòsti labro alor
Segur an la frescour dis agrioto bello;

E se de Vincenet aviéu lou parla d'or,
Vous diriéu que jamai la plus richo daurèio
Vauguè frescour, jouvènço e voste noum, Mirèio!

En Crau, Mai 1877.

EMÉ SA PLUMO

A * * *.

Aquéu que sènso se geina
A pres ta plumo doucinello
E l'a fourçado à camina
Au mitan d'idèio nouvello,

Aquéu es un enfant que n'a
Pèr tout bonur que farfantello,
Aquéu voudrié pas estre na,
Aquéu viéu que de regardello.

Dòu tèms que canto iue blu, péu blound,
Es pancaro au bout sa cansoun
Que dous bras raubon l'idealo;

E tè, ta plumo que gemis
Souto sa man que fernesis
Fara 'nca ta cansoun nouvialo!

31 de Desèmbre 1878.

ENCÒ DI MUSO

Sus l'Album nouvian de la felibresso Leountino Goirand.

L'Oulimpo es en grand boulegado:
Li Muso davans si mirau
An si beloio desplegado,
E brihon diamant e courau;
De tout caire, sus li cadiero,
Se veson rauto de satin,
Mantèu de sedo, plumo autiero,
Cherpo de fiò, riban aurin.

Pèr li noço d'uno divesso
Ansindo s'alestisson tant,
E li sourrire e la tristesso
Fan còrus dins aquel envanc.
Cliò, souto si lausié-flòri,
Dis: — Tre deman farai l'istòri
D'aquéu mariage benastra;
Mi sorre, pèr nosto amiguelo,
Deman reprendrai ma troumpeto,
Que luen, bèn luen resclantira.

MELPOUMÈNO, la fàci grèvo,
Se passant de couturne nòu,
Dis: — Ta partènço, que me grévo,
Amigo! lou destin lou vòu!...
O tu, qu'as canta Pauro Maire,
Plouro-me, canto: pauro sor!
A tu mi scètre esbarlugaire,
A iéu moun pougnard dins lou cor!

Talio a fa toumba soun masco
E davans lou mirau sourris:
— Oh! que coumèdi! fau que nasco
M'entourne de la noço, dis.

O ma douço amigo! o chatouno!
T'envas; mai vaqui ma courono,
Es d'èurre: sarai sèmpre à tu!
Autant que ieu sigues fidélo...
Ço disènt, assajo, la bello,
De broudequin que i'an adu.

Tendroun coume un er de flahuto,
S'entènd un gème en un cautoun:
Es EUTÈRPI que, soulo e muto,
Dins soun cor canto l'abandoun.
Sa tèsto de bèuta clarejo.
Gemis: — Ma courouno de flour,
Te la doune; toujour flourejo,
Car l'ai bagnado de mi plour!

TERSICORO, vivo, ajouguido,
Danso e, metènt dintre si péu
De bèlli garlando flourido,
Crido: — Oh! que vau m'amusa, ieu
A tu, ma surreto bloundino,
Balarai moun arpo divino,
E ié jougaras ti causoun:
Ausindo metras dins moun amo
Touh cor amaire, gènto damo,
E saren sèmpre à l'unissoun.

Souto sa courouno de roso,
ERATÒ miro lou nistoun
Di gauto redouneto e roso
Qu'es à si pèd. — O Cupidoun!
Ié vèn, perqu'as tra blessaduro
A moun amigo?... Amigo, auras
Ma liro en souvenènço puro...
Pénso à ieu quand la toucaras!

CALIOPO, fiho erouico,
Emé soun aire majestous,
Dis en paraulo maguifico
A Cliò: — Sarai pèr l'espous
ço que saras pèr l'espousado;

Farai uno novo Iliado
De si vertu, de si talènt,
E piei, dins lou bouquet d'arange
Que vai ana porge à soun ange,
Metrai mi lausié redoulènt.

Dedins uno rauto estelado
Que fai belugueja lis iue,
URANIO: — O ma bèn-amado,
Dis, farai resplendi ti niue!
Lou bonur, luen, fau que s'escounde
Tène la terro dins mi man;
Chausiras un liò dins lou mounde
Pèr fa toun nis ‘mé toun amant.

S'assajant sa tunico blanco,
Lou front de pèrlo courouna,
POULIMNIO fai: — Rèn te manco;
Aro toun cor a boutonna.
Ma sorre, escouto moun arengo;
Counservo de-longo ta lengo;
Iéu n'ai que li flour dóu parla,
Te li semounde en souvenènço;
La lengo fai trouva l'absènço
Encaro douço à l'eisila!

L'Oulimpo es en grand boulegado;
Li Muso davans si mirau
An si beloio desplegado,
E brihon diamant e courau;
De tout caire, sus li cadiero,
Se veson rauto de satin,
Mantèu de sedo, plumo autiero,
Cherpo de fiò, riban aurin

Tout-d'un-cop APOULOUN aribo
E ié fai: — Mis amigo, lèu
En campagno pèr d'autri ribo!
Prèste es lou càrri dóu Soulèu.
Pèr l'Alzoun quiten lou Permesse!
Pèr Gardoun Castalio cesse
Si milo noto de cristau!

Quiten Elicoun pèr Ceveno,
E dins la Pradarié qu'aleno
Oublidén lou Pinde suau...

Em'acò, tòuti li príncesso
Dintre lou càrri de Febus,
Pèr ana de-vers la divesso,
An pres si plaço en plen trelus.
Au mitan, uno canestello
Rejoun tòuti li doun nouviau,
E Pegaso a de farfantello,
S'emporto... e part coume l'uiau.

MANDADIS

Cadun de nous-autre a sa Muso:
Quau canto, quau plouro, quau ris,
Quau fouligaudo, quau s'amuso,
Quau sènso brut bastis soun nis!...

Vuei fasès voste nis, O sorre!
En pas dins lou bonur demore!

Nòsti Nuso fan de souvèt:
Aquest libre es la canestello
De nostro amista Damisello;
Madamo, de neste respèt.

Abriéu 1882.

DAVANS SANT-LOUIS D'ANTIN

Sus l'Album nouviau de Mllo Mario Jasmin.

Davans Sant-Louis d'Antin uno troupo angelico
Trenavo d'arangié. Dedins uno musico
Tremadavo la glèiso en un councert suau.
E sus la plaço ebi d'òudour e d'armounio,
Li gènt se disien que maridavon la fiho
D'un prince o de quaucun plus aut...

Davans Saint-Louis d'Antin un vièi passè; sa tèsto
Raiounavo d'un lum qu'enlusiguè la fèsto;
Lou troupèu angeli lou saludè'n gascoun;
L'arangié tout-d'un-tèms en jaussemin se chaujo..
Lou pople emé respèt sus la plaço se raujo
E picon di man i balcoun...

Davans Sant-Louis d'Antinalor plus res questiouno:
De-segur quaucun aut marido sa chatouno.
La porto sout li det de dous ange se duerb,
E la troupo angelico em'aquest refrin cuerbe
Li vivat que la foulou entouno:

*Las carreros diouyon flouri
Tant bello nòbio bai sourti,
Diouyon flouri, diouyon grana
Tant bello nòbio bai passa!*

Febrié 1883.

A FREDERI MISTRAU

Pèr si noço.

Que l'ounour es que languitòri
E qu'es pau de causo la glòri,
O Mèstre, naus l'as bèn moustra:
Tu tant grand qu'emplisses lou mounde,
As prouva que loun cor avié pas soun abounde
E vers quicon autre s'es tra.

Tu qu'à travès la Crau immènso,
Au grand soulèu de la Prouvènço,
Coume fai l'eigloun majestous,
As òupousa toun front superbe
En vesènt pièi, amount dins lou cèu que se duerbe,
Clareja'n astre luminous

An belugueja ti parpello.
Sout li rai rousen d'uno estello
Es parti lou fiò, de tis iue,
Mai quatecant es dins toun amo,
Es dins toun cor cremant que se porto la flamo
Qu'au soulèu adusié la niue.

E ta Mirèio destinado
Que de ti pantai èro nado,
Descèndre vers tu la vesèn,
Sa voues, s'entend ges coume aquelo,
La recouneissen bèn, aquelo voues es
Elo Que souspiro: — T'ame Vincèn!

De neste Mèstre, o nòvio blanco,
Vène lèu dins nòsti calanco,
Entènde crida nòsti cor;
Dins la Prouvènço sian toui fraire,
Vène lèu, vène, auras pèr maire.nosto maire,
E la pouësio pèr sor!

Saras l'estello felibrenco
Que nous aflamo, O Dijounenco!
Saras neste eterne printèms,
E sout ti rebat pur e rose,
Oublidant que tout passo emé li flot dòu
Rose Rediren li cant d'autre-tèms.

27 de Setèmbre 1876.

BRESSARELLO

Pèr moun pichot Lucianet.

Fai ta nouneto,
Moun anjoun poulit,
Es ta meireto
Que vòu t'endourmi.
L'a dich à toun paire,
Qu'es un pau troubaire,
E lèu-lèu pèr soun anjoun
M'a canta'questo cansoun.

Fai ta nouneto,
Moun pichot amour,
Es la meireto
Que bresso toujour.
Toun brès que creniho
Es la pouësio
Qu'à toun paire fai veni
Li cansoun pèr t'endourmi.

Fai ta nouneto,
O moun bèu mignot,
Es ta meireto
Que te canto acò;

Tout acò 's de rimo
Que vuei, sènso limo,
Pèr tu vèn de fabrica
Moun amour qu'es toun papa!

Fai ta nouneto,
Plus tard saras grand,
Paire e meireto
Saran pièi de grand.
Mai coume toun paire
Saras un cantaire,
E, moun ange, emé ti cant
Bressaras ti vièis enfant!

Fai ta nouneto,
Vendra la sesoun
Qu'uno meireto
Te dara'n pichoun.
Dins de rimo folo
Metras sa bressolo;
Basto l'endormon ti vers
Fai badaia l'univers!

Fai ta nouneto...
Lou vaqui que dor.
Ah! ta meireto
Béu ta caro d'or..

Touto pouësio
Dins toun raive briho.
Ma perlo, sus moun senet
Fai ta nouneto-nounet.

21 de novèembre 1883,

CANSOUN D'ANTAN

A Louis Vassalo, moun fihòu.

Coume antan au tèms di fado
Li fado
Guierdounavon si fihòu,
Museto, qu'es un pau fado,
Vai guierdouna moun fihòu.

E ié dis: — Eiçò m'agrado,
Agrado

De recebre vuei un iòu;
A paire, à maire i'agrado
Que te doune vuei un iòu.

Mai acò's pas tout: apounde,
Apounde

Uno brouqueto, e pièi mai,
E, pièi, pichot ange, apounde
Un pessu de sau... pas mai.

D'acò n'a ri tout lou mounde.
Lou mounde

Dis: « Museto, bèn verai,
S'arrouinara pas. » Lou mounde
Entènd pas forço au verai.

Mai i'a respoundu Museto:
— Museto

Vous dis que sara, lou saup,
Poulit coume un iòu. Museto
Dis: a E bon coume la sau.

E dre coume uno brouqueto,
Brouqueto

Esclarant li prouvencau,
Caminara dre, brouqueto
Fasènt lume i prouvençau,

Nouvèmbre 1883.

A MA FIHOLO MARIO-LOUISO

Dedins li mes de l'annado a chausi
Lou plus bèu mes pèr naisse: tout verdejo,
Flouris la roso, e l'aucèu à plesi
Canto, e sus tout un dous blasin perlejo.

O bèl aujoun, verdejo à toun lesi:
Sies l'esperanço; o pichouno, flourejo:
Tu sies la roso; amour, fai-nous ausi
Toun riéu-chiéu-chiéu: sies l'aucèu que s'eigrejo

Jusqu'a ti larmo, à toun pichot ploura,
Que van sembla l'eigagno que s'escampo
Au mes d'abriéu sus li fueio e li pampo..

Oh! tout en tu la vido a respira,
Dedins li mes as chausi de l'annado
Lou plus poulit di mes pèr èstre amado!

Villa-Paradis, 10 d'Abriéu 1881.

A PICHOUNO RÈINO

Ma neboudo.

*... Ta maire
Despièt toun hateja, pecaire!
Couchado souto l'erbo, dor.*

J. ROUMANIHO.

I

Quaud saras grando, enfant, te diran que ta maire
Te couneissè pas tròup;
Que sus ti bouco, ai, las! te poutounejè gaire,
Qu'anères lèu en dòu;

Te diran, ange pur, que jamai sus sa faudo
Sautères douçamen,
E que, quand fasié fre, jamai sa bouco caudo
Te dounè soun alen;

Que sucères un la, pauro, qu'èro pas d'elo;
Que pas même uno fes
Dins toun brès t'endourmè d'uno cansoun nouvello,
Em' un èr gai e fres...

II

Partié quand tu veniés: lou bon Diéu faguè change,
Metè dins lou toumbèu
Uno martiro, alorque nous dounavo un ange
Pur e blanc coume nèu.

Ploures pas, moun amour, eissugo ti lagremo,
Ta maire, d'amoundaut,
Soufre en vesènt toun cor que dins la doulour cremo;
Ti plagnun ie fan mau.

Pènso à-n -elo souvènt, digo soun noum, pechaire!
Chasque sero à geinous,
E, quand t'endourmiras, amount emé ta maire
Saras en raive dous.

27 de Janvié 1875

LA MAIO

A ma sorre Maria Astruc.

Vesès-la coume es bello aquelo jouino fiho
Souto soun velet blanc, e talo qu'uno abiho
 Au mitan d'aubespis, de roso e de lila;
A soun entour se vèi courre d'eici, d'eila,
 Em' un sietoun en man, si pichòtis amigo
 Poulideto tambèn, e coume de fournigo,
 Acampant de pertout. Carrejarien bèn mai
Quand vènon au passant: — Pèr la Bello-de-Mai!
E lou passant sourris: — Tenès, douço jouvènço,
 Iéu ame vòsti jo, blàndqui flour d'innoucènço,
 Tenès aquésti sòu que vous douné dòu cor,
 Mai dounas-me peréu aqueste boutoun d'or
 Qu'esbarlugo au mitan d'aquelo margarido,
A quicon que me plais: retrais, quand es flourido
 La cacio , ma flour, flour ane ieu ame tant
 Pèr amor di péu blound d uno galanto enfant
Qu'amère bén, ai! las!... mai vau ploura tout-aro!
Dequé vous vau counta, vautri que vosto caro
 Dis: bonur, dis: espèr, vido, prousperita.
 O chatouno, courrès; anen, de tout cousta
Semenas vòsti flour, li flour que Mai vous douno
L'an que vèn n'i'aura'nca pèr faire de courouno;
 Courrès, amusas-vous, de roso n'i'a toujour
 E vautre eternamen colirés pas de flour!

E li chato galolo an fugi; coume l'iéli,
Blanco e puro la Maio a lis ine de-vers éli,
E quand arribon: — Tè, dison, avèn de sòu,
 Tout-aro fara bon de fa gousteto au sòu
 Eila dins lou bousquet, souto li gràndis aubo!...

Iéu eamine enterin, l'espaci me derraubo
ço qua se diguè piei, quand sutrau davans iéu
Ausiguère uno voues doulènto:— Au noum de Diéu.

Agués pieta, moussu, d'uno pauro famiho;

Vesés à vòsti ped uno maire, sa fiho,
Em'un drole que sou n coussgui pèr la fam.

Pèr iéu mourriéu bèn, mai mi pàuris enfant!
Li pode pas quita; que parton noun lou vole;
O ma bello pichoto! e tu, moun brave drole!

Vole pas vous quita. Se sabias, bon moussu,

Quand lou malur jour vous vèn pica dessu
Se pòu plus arresta. Me soutravo unu espèro,
A l'autouono passa me disieu: — Quand la terro

Sara pleno de fueio, anaras li cerca,

Poudras au mens dourmi, piéi, se n'en rèsto enca

Poudras faire de fiò pèr recanfa li mèmbre
De ti pichots agnèu... Mai,nouvèmbre, desèmbre

Venguèron e pèr sòu veguère escassamen
Pas uno soulo fueio. Oh! pèr iéu quet tourmen!

Anave dins li prat, la niue, souto lis astre,

E vesieu de grand fais alesti pèr li pastre
Que l'endeman matin adusien dins lou jas...

E iéu e mi pichot, tout l'ivèr dins lou glas,
Anerian, pèd descaus, pregallt dóu bout di labro

Dòu tèms que dins, li fueio, au caud, dourmien li cabro!

— Pauro maire! faguère en eissugant un plour.

— Bon moussu,reprenguè,coumprenès li doulour

Que sagaton lou cor d'uno femo, pecaire!

Quand ié dison li siéu: un tros de pan, ma maire!

E qu'elo ié respond: maujarès mies deman,

Pèr nàutri chasque jour se pasto pas de pan!...

Poudiéu plus supourta li plagun de la femo,

Me sentieu estoufa pèr de gròssi lagremo,

Tambèn sèns muta, dins sa man, esmougu,

Metère quàuqui sòu dins ma pòchi escoundu,

E m'anave enana, quand m'arrestè la pauro:

— Gramaci, noble cor es lou cor que restauro!

Avès d'enfant vous? nàni ? avès un paire? avés

Quaucun que vous espèro au lindau quand venés?

Oh! benesi sigués,vous emai quau vous amo,

Aguès sèmpre lou cor countènt e siavo l'amo...

E l'enfant qu'au teté suçavo un la doutous,

Espandigué sus iéu un sourrire amistous.
Marchère quauqui pas,l'iue nebla, l'amo routo,
 Vesiéu plus rèn de gai aro sutre ma routo,
 Tambèn virère lèu, reprenènt lou camin
Ounte aviéu rescountra Maio, iéli, jaussemin,
 E coume douçamen, en secant mi parpello,
 Mountave, apercebère amount mi vierginello
Qu'arroundavon quaucun; pièi,quand mis iue segur
 Pousquèron s 'enfounsa dins aquéu nivo pur,
 Veguère au bèu-mitan la malurouso maire.
Tres chatouno avien pres si sietoun e pèr l'aire
Courrien vers li passant, courrien coume jamai,
En cridant: — Bràvi gènt, pèr la Bello-de-Mai!
 E li sietoun lèu plen, autant-lèu de la Maio
 Eron veja dins lou bacin, e vivo, e gaio,
 Urouso li jouvènto, urouso dins un vòu
 Landavon d'autro part pèr acampa de sòu.

Quand lou dous roussignòu cantés sus l'auto branco,
La chatouno qu'avié velet blanc, rauto blanco,
 S'aubourè de soun sèti e prenguè lou bacin
 E roujo s'aprouchè de la mandianto ansin:
— Prenès aquel argènt,madamo, que vous douno
 La Maio e sis amigo, e lou mes di courouno.
 Aquel argènt n'avié rén de la carita,
 Ero tout bounamen pèr ana fa 'n gousta
 Eila mounte vesès verdeja 'quelo erbeto,
 Mai aro voulèn plus faire nosio gousteto,
 Prenès aquel argènt, madamo, l'an que vèn
 Se lou bèu mes de Mai pèr nous-àutri revèn,
 Auren enca de flour pèr nòsti jòuini tèsto;
 Auren enca de sòu pèr faire nosto fèsto!

14 de Mai 1877.

L'OUFELIO PROUVENÇALO

A dono Roso-Anais Roumaniho.

*Ainsi qu'Ophélia par le fleuve entraînée,
Elle est morte en cueillant des fleurs.*

V. Hugo

Foulastrejant sus la ribo,
Inchaiènto de sis an,
A través de l'auro qu'arribo
En poutounejant li pibo,
Elo davalو en cantant.

En cantan elo davalо:
Sèmblo un rai d'aubo que sort
Pèr derreviha li flour palo.
Subran un encèns s'eisalo
E ié boulego lou cor.

A soun caire un aigo lindo
Fai ausi soun douz murmur,
E'nterin que sa cansoun dindo
Elo s entre-vèi ansindo
Dins aquéu mirau d'azur.

Vèi sa caro d'anjounello
Encadrado dins li flour.
Coume la vivo damisello
Vai e vèn, boulegarello,
Leissant sus tout si coulour.

Di floureto, de l'eigueto
— Elo fai lou vai e vèn,
Di roso que ié fan liguelo
N'en vòu empli sa maneto
Au bord dóu toumples d'argènt...

Mai? o bèl ange, la vido
A de plang dins si councert,
Lou bomlr, bèn aut noun se crido,
E soutu l'erbo flourido
De-fes se rescound la serp!

O divino segarello,
Erias dos, lou sabiés pas?
Pèr derraba li flour nouvello...
Aguères pas la plus bello:
La Mort t'avio dins si bras!

Quand se dis di destinado!
Toun matin èro trop bèu!
Quau t'aurié di, jouino envoulado,
Que li flour qu'aviés trenado
Servirien pèr toun toumbèu!

Aviés pas proun de beloio?
Erès pas un boutoun d'or?
E dins ta jouvènço galoio,
Dequé mancavo à ta joio ?
Dequé mancavo à toun cor ?

E tis amigo, pecaire!
Pertout van crida toun noum,
Au clar mirau, au vèut bressaire.
Mai un glas long e plouraire
Soulet ié fara respound.

Vai, iéu ploure pas, santouno,
Qu'as fugi li jour amar,
E se lou poudiéu, o chatouno,
O martiro di courouno,
T'aubourariéu un autar!

A DONO DEVRIÈS
Cantairis dóu Grand-Opera
APRÈS UNO REPRESENTACIOUN DE FAUST

Dins un rai diamantin, o blanco Margarido,
La luno sus toun front mandavo si poutoun,
Dóu pargue ilumina lis ùmbli margarido
Se clinavon vers tu, sus 1 èstro d'assetoun.

E jitaves lou noum de toun Faust is estello
Dins un cant plen d'amour que nous prenié lou cor
Bén mai que l'aubespine qu'embaumo la pradello,
Perfumaves l'aureto emé ti noto d'or.

E iéu, de te bela, mut, pensatiéu, sounjaire,
Aviéu plus d'amo, aviéu plus de sèn: lou bonur.
M'aubouravo de terro en pantai countemplaire;
Chourlave lou neitar que largaves tant pur.

E cridaves loujour toun Faust, que lou demòni
Tenié dins sis arpioun; lou làngui, à la pèr-fin
Venguè fa niescladis à ta douço sinfòni,
E d'acò mai- que-mai aguères biais divin.

Tout-à-n-un cop s'entènd un crid; dins ti bras touumbo
Toun amant abrama, d'amour lout coumbouri,
E poussère un soupir: — O tendrino coulouumbo,
Que noun signon pèr iéu tis aire alangouri!

A la plaço de Faust me sariéu vougu traire,
Divo fado, à ti pèd; que m'aguèsse agrada
De t'ana dire, iéu: — Femo, engèni douumtaire,
Mefistò soul n'a pas lou secrèt d'enfada!

28 de Febrié 1876

A LA FONT VAU-CLUSO

A-n-Albert Arnavielo.

Rèn agouto la font

De pouësio.

T.Aubaneu.

Font de Vau-cluso, o tu mai puro
Que lou viei castèu-nòu que nous empuro,
Tu plus lindo que lou cristau,
Pren; em' aquéli prouvençalo
Te porge mi vers prouvençau
O font reialo!

Mai deque faras de mi flour,
Aquéu simbèu de souvenènço ?
Tu qu'aprés cinq cènts an as enca la frescour
Que Lauro de Prouvènço
Te dounè, mirau de vertu,
Quand se miraiavo dins tu!

O cantarello!
Mai deque faras de mi vers,
Tu qu'emplissères l'univers,
Founteto encantarello?
Tu que chasque degout de toun aigo es un plour,
Uno douço noto d'amour
De Petrarco cantant sa dono jouino e bello.

De pouesio o dous sourgènt,
Dòu caste amour resson èterne,
Qu'enchau ? vole dins moun printèm
Redire toun noum sempitèrne.
D'amour,Francés, siéu escoulan,
E pamens ai vist mi vint an
Ploura subre d'amour crudèlo.
Qu'enchau? Lauro, vole à ti pèd
Pausa mi bouco emé respèt,
Vole ploura, mouri sout toun ine que pivello!

Noun sai se siéu pouèto iéu,
Mai ama sabe, e l'amour plouro;
Sai que l'amour soufre à touto ouro
 Sabe que lou béure agradiéu
 Pér lou pouèto es li lagremo,
 Que sa vido es que terro-tremo.

Mai sabe que la liberta
Pér lou pouèto es caressado,
E pamens aquelo es leissado

Au mendre mot de la bèuta.
Lou Tasso, o Petrarco, toun fraire,
 De quant amè mies, calignaire,
 Escouta la voues de soun cor,
 E demoura dins li cadeno,
 Pèr éu tant agradivo peno,
 Cantant sa gènto Eleonor!

Se pèr èstre pouèto, adounc, o Mèstre,
Fau ama, ploura, vai iéu sabe l'èstre!...

Font de Vau-cluso, leisso dounc,
Leisso abéura ma bouco ardènto
 Dins toun eigueto trelusènto
 Que tant de cop s'es, à l'aparicioun
 De douz iue clar en revacioun,
 Ensournido emé crènto.

Bluio coume lou cèu d'azur
Que te mando li bais de si milo esteleto,
 Leisso-me dintre toun sen pur
 Refresca de mi flour la pichoto garbeto:
 Aqui, mi flour atrouvaran
Dins lou plourun dóu Mèstre uno nouvello eigagno,
 E que dègue èstre longo o courto ma campagno,
 Sus moun cor toustèms restaran!

LA RÉINO ISABÈU

de Roumanò.

Strainu 'n facia'i se inchina

B. ALECSANDRI

Li troubaire, nòsti rèire,
Cantavon femo e coumbat.
Nautre eiretan de si crèire,
Coume éli sauprian toumba.
Mai vuei, au cèu, la pas briho
E nous rèsto que l'amour,
O femo de Roumanò,
Vesès à vòsti pèd li fiué di troubadour.

Sabèn que sias felibresso
Au pais d'Alecsandri ,
La Mar boundo d'alegresso
E vous reservo un abri.
Di grando, elo, fai sa mio:
Sias grando, avès de cant dous,
Sereno de Roumanio,
Dins chasco erset la Mar se courbo davans vous.

O Vous que pourtas courouno
Au païs de Carolus,
Dins nosto ciéuta raiouno
Un diadèmo de lus.
Nosto latino patriò
Lou pauso à voste front bèu,
O Rèino de Roumanò,
Venès trouna dessus l'Empèri dóu Soulèu!

Abriéu 1883.

II

QUAND S'ESPANDISSON

A-N-UNO JOUINO CASTELANO

*Se il vostro amore é perfetto,
perchè non lo partecipate a chi si conviene?*

GOLDONI.

S'erian encaro au tèms, que nòsti vièi troubaire
Anavon en cantant de castéu en castéu,
Escalariéu souvènt au vostre, e, pèr vous plaire,
Emé queto afecioun mi vers sauprien retraire
Voste biais qu'atrove tant bèu!...

Se i'erian mai au téms de nòsti vièi troubaire,
De mis iue amourous vous vourriéu béure, iéu;
Ma zambougno pèr vous enfestoulirié l'aire;
Chasque mes, chasque jour, vous veiriéu; mai pecaire!
Aquéu bèu tèms es luen, moun Diéu!

Adounc, se fau teisa vo canta dins l'oumbrino;
Fau escoudre un desir que vous vèn counsumi,
E, quand pèr li bèus iue d'uno gènto bloundino,
L'amour vous pren lou cor, e l'enflamo, e lou mino
Fau resta mut e pregemi!

Pamens, s'un parpaioun amo uno prouvençalo,
La vai poutouneja lèu lèu e tant que vòu,
E, ravidò, la flour un dous perfum eisalo...
Vous, sias uno floureto! Oh! se iéu aviéu d'alo
Coume vers vous prendriéu moun vòu!

Coume m'abéurariéu à voste fres calice!
Nourri de voste mèu, coume devendriéu fort!
Respira voste encens farié moun soul delice;
Sias uno flour d'azur; de bonur n'en fernisse,
Oh! dounas-me dos alo d'or!

Car vous vese pertout: la niue, Madamisello,
Emplissès mi parntai; à touto ouro dóu jour
Moun cor vèi vosto image e moun amo vous bèlo;
Lou sero, au calabrun, sias ma premiero estello ,
Es vous que revese toujour.

Oh! pèr dequé, príncipio, es tant luen de Marsiho
Voste nis redoulèut, voste gènt castelas?
Moun cor vòu s'espandi rèn qu'aqui mounte briho
Voste régard tant pur; es de sis escandího
Que vuei espèro soun soulas.

Mai mòublidias bessai? — Eh! bèn, la remembranço
A grava dins moun cor tout çò que vèn de vous:
Me souvendrai toujour emé queto amistanço
Me sarrerias la man. — Oh! santo benuranço!
Sènte enca vòsti det courous!

Sias jouino, noblo e bello, e sias ma segnouesso;
Aves un castelas; iéu, n'ai que moun amour,
Mai moun amour es digne e fièr, o viscoumtesso,
Es d'éu que me vendra moun titre de noublesso:
Es noublesso dóu troubadour.

Souvenès-vous que sias feleno d'un troubaire,
E qu'em' un soul regard troubairé me farès.
Un miracle tant bèu, segur lou voudrés faire:
Moun cor à vòsti pèd, barbelant se vèn, traire,
Pènse que lou regardarès.

Juliet, 1875.

MEMENTO

Reyna d'amor, à vos me clam per trobar lo repaus...
MADAMO DE VILO- NOVO.

I

Despièi que tòuti dous, à travès li bastido,
N'avèn plus derraba li floureto espandido,
Espandido just dóu matin;
Despièi que lou mau- sort entre nàutri, ma migo,
Es vengu se jit; despiéi que lis espigo
Soun plus presso pèr vous sus li bord dóu camin;

Despièi que dins li prat, o ma douço Marò,
Avèn plus tòuti dous tengu nòsti sesiho,
Nòstis entre-visto d'amour;
Despièi que vòsti pas an plus marca ma draio,
E qu'ai plus reçaupu de voste iue que dardaio
Lou lume que moun cor cercavo niuech e jour;

Despiei qu'un calabrun mandè sus nòsti tèsto
Un d'aquéli rebat dóu paradis en fèsto;
Despièi que nous sian plus revist,
O ma douço Mario, o mi plour, o moun rire,
Jamai à voste cor quicon es vengu dire:
I'a'n jouvènt perabas que d'amour se passis?

II

Tres printèms an fugi despièi que de vosto amo
N'ai plus senti lou fiò, n'ai plus senti la flamo,
Tres cop lis aucèu an canta,
Tres cop dins li pradoun an flouri li baragno
E vous, rèino di flour, mai puro que l'eigagno,
Qu'avias di roso blanco ensourni la bèuta,

Vous que iéu ploure tant, descounoula, pecaire!
Vous reveguère plus. Is auceloun cantaire
Demandère souvènt de vous:
Quand lou soulèu s'escound dins la mar argentalo,
Au roussignòu largant sa cansoun celestialo
Diguère bèn souvènt voste noum d'à-geinous;

Quand lou soulèu parèis au trelus di mountagno ,
De-bado vous cridère, o ma tèndro coumpagno.
A la calandro bèn souvènt
Aprenguère à souna lou noum de Marieto.
Mai lou dóu s'èro mes dins moun amo paureto,
E sus la terro siéu coume la fueio au vènt.

III

Digas, vous ensouvèn de nòsti permenado,
De nòsti charradisso au bon de la vesprado,
Vous ensouvèn de tout acò?

D'aquéli souveni moun èstre n'es tant coume
Que dins mi plour de-fes ai un sourrire coume
Se delongo entendiéu vosto voues dins l'ecò

Vous remembras peréu de nòsti jo, chatouno,
E di milo poutoun e di milo poutouno
Que nous dounavian d'escoundoun ?
I'a bèn de tèms d'acò, ma douço bèn-amado,
E pamens an enca, mi labro desmamado,
La frescour e lou mèu de vòsti dous poutoun.

Oh! coume òublidariéu tant gènto creaturo!
Rapelas-vous que dé vosto cabeladuro
M'avès douna'n saurin anèu,
Vous-meme avès pèr iéu cisela vosto treno,
O souveni d'amour, o soulas à mi peno!
Un frisoun d'or culi sus voste còu de nèu!

Quant de fes quand de plour se nègon mi parpello,
A sa visto ai trouva la pas encantarello,
Vesènt veni de plus bèu jour;
Tau un despatria que gemis dins soun isclo,
Quand un rai de soulèu sobre lou front ié gisclo,
Benesis aquéu fiò que touco sis amour.

Pièi ai mai un espèr dintre moun languitòri...
Qu saup se desempièi avès dins la memòri
Ço que me voulias revela.
Ensouvenès-vous bèn: — Se dimenche vous vese,
Vous dirai quaucarèn. En esperant iéu crese
Que dirès en degun que vous dève parla.

E lou dimenche après, tout soulet dins l'andano
Qu'amavian de boula quand la calour s 'esvano,
Anère espera pensatiéu;
Aviéu gau, aviéu pòu d'ausi vosto nouvello,
Vous desirave tant que desiro uno estello
Lou viajaire esmarra dins lou bos plen de niéu.

Dins lis ort verdoulet anave, pantaiaire,
I parpaioun lusènt que venien de tout caire
Poutouneja si fres boutoun,

Disiéu: — Oh! s'avès vist en camin uno angèlo,
Au miei dis ùmbli flour, e bello entre li bello,
Me fagués pas soufri, digas ounte es adounc. .

Mai lou paure agrouva'u cantoun d'uno cariero
Au riche sadoula dis en van sa preiero
En demandant la carita:
Mi parpaioun lusènt eron sourd à mi peno,
E semenant sus iéu si coulour vivo e leno
Calignavon la tepo e li flour de-mita.

La nine venguè jita sa capo sus la prado.
Venus la blanco au founs dóu cèu enfenestrado
Sounè si coumpagno. Autant-lèu
D'eici, d'eila lis astre en bouquet pounchejeron.
— Elo, l'aviéu sounado! —E mi plour perlejeron
Partère pèr noun veire un tant poulit tablèu.

IV

Desempièi siéu vengu milo fes à l'espero,
E pas mai lou matin, e pas mai dins lou sero
Res que m'ague parla de vous;
Tres ivèr an boufa vòsti piado lóugiero,
Mai dins moun esperit sias toujour touto entiero
Ansín n'es—ti pèr iéu? Sariéu tant malurous!

Oh! se d'aquel annour avès garda'no brigo;
Oh! se d'aquel amour, ma tèndro e douço amigo,
Avès encaro un souveni;
S'avès à vòsti plang mescla moun noum, pecaire!
Se dins un soulet raive avès vist voste amaire,
Moun sort regardarai enca coume beni.

Mai se pèr iéu voulié s'abauca la marino
E coundurre ma barco à la terro divino
Mounte avès basti voste nis;
A la fin se moun cor sourtié de soun martire,
Oh! se sabiéu un jour ço que me voulias dire
Moun cor óublidarié tout ço qu'aro soufris.

MANDOULINETO

En raina sai amaretz cavalier.

PÈIRE VIDAU.

S'ère lou divin Creaire,
Te dounariéu pèr mantèu
Lou mantèu blu que dins l'aire
Esbrihaudo de tout caire
En nous escoundènt lou cèu.

S'aviéu la man pouderouso
D'Aquéu qu'a di: — Luse, lus!
Te metriéu, bello amourouso,
Au front lis estello blouso
Pèr courouno de trelus.

E pèr trone auriés lis oundo
Que te bressarien bèn plan
Dintre si dentello bloundo
E a mar, qu'en ausso boundo,
S'abaucarié sout la man.

Iéu alor, rèino divino,
Prousterna sariéu toujour,
Supausant que Diéu se clino
A ti pèd, o mistoulino!
Cantant lou saume d'amour!

A MOUN AMIGO!

*Dona, ni non dezir mais re,
Gent m'estara s'a vos sove...*

GIRAUD-LOU- ROUS.

O moun amigo, èro la niue,
Niue pleno d'amour e d'estello;
D'amount la luno clarinello
 Se miraiavo dins tis iue.
Ere à ti pèd, t'ensouvèn, digo?
Disian rèn, mai lou cor disié,
 E ta bouqueto sourrisié,
 O moun amigo!

Penequejavon lis aucèu;
Soulet un roussignòu cantavo,
E tant soun cant nous agradavo
 Que lou cresian veni dóu cèu;
 Au mitan di sàuris espigo
L'aigo dóu riéu disié soun èr...
Te n'ensouvèn d'aquéu councèrt,
 O moun amigo!

E te clinères douçamen
Sus moun espalo fernissènto;
De ta bouqueto redoulènto
 Sentiguère lou dous alen;
Coume au chaine l'èurre se ligo,
 Nous erian liga tòuti dous,
 E t'embrassère tout urous,
 O moun amigo!

Alor, la luno s'escoundè
 Darrié lou nivo que passavo;
Lou roussigòu que nous bressavo
 Au brut dóu poutoun s'aplantè;
 De tout caire dins la garrigo
Lis aucèu diguèron au vènt:
 — Fresco-lèi! te n'ensouvèn,
 O moun amigo?

UNO LAGREMO

Ieu am gran dol luii dyssi: domaysela...

BERENGUIÉ DE L'ESPITAU.

Aviéu dins vosto man ma man e voste jougne
Venié dintre mi bras tout entié se rejougne.
Ma bouco aurié pouscu floureja voste front...
E lou clavié sutiéu acourdavo de son.

Ma bouco aurié pouscu beisa vòsti trenello,
Quand subran diguerias, o gènto damisello:
— Coume es galoi un bal, que coucho lou soucit,
Touto ma vido, iéu me voudrié vèire eici!

A l'aire dóu clavié mesclant la charradisso,
Dansavian; lis aucèu tamben dins li sebisso
Sauton de branco en branco e piéuton tout au cop.
— Avès dounc de soucit, faguère coume acò,

Damisello, quand sias luen dóu bal? — Peson gaire
Li miéu, mai tant n'en ai; quau n'en a pas, pecaire!
E vous, amas de rire? — Ah! siéu la bono imour,
Se sabias que noun sai ço que countèn un plour!

Oh! que messorgo aqui disiéu! Me repassave
Que dins uno ouro o dos nous anavian quita,
E'no perlo d'argènt que d'escoundoun secave,
Dintre vòsti péu d'or anavo s'agouta...
E pamens tout urous, O jouvènto, dansave
Car lou clavié n'avié pas l'èr de s'arresta.

MA GRANDO BRUNO

*E pis joys d'amor m'es falhitz
Totz lo me par sol uns ortz
E mos chans n'o m'es mai conortz.*

RIMBAUD DE VAQUEIRAS.

Sis iue negre coume lou Vin,
Coume lou vin ciéuclon ma tèsto;
Soun visage tout mistoulin,
Retrais lou rebat d uno fèsto.
Vaqui perqué, quand dins lou cèu,
Sounjarello arribo la luno,
Cerco lèu-lèu
Ma grando bruno.

L'estieu e li bèu jour d'ivèr
Trèvo li lèio de la Plano.
A soun biais mystique, à soun èr
Dirias Mario l'Egiciano.
Elo me counèis plus, e tant
A sauta' mé iéu sout la luno
Estènt enfant
Ma grando bruno!

O ma cansoun, volo amoundaut
De-vers lou brès de ma jouinesso
Es aqui proche soun oustau,
Elo ié gardo sa tendresso...
O ma cansoun, rapello-ié
Nòsti brande au clar de la luno,
Coume risié
Ma grando bruno.

Rapello-ié, quand asseta
Noumbrous sus un bancau de pèiro,
Qu'ère toujour à soun cousta
Ausènt un conte de sa rèiro.

Iéu d'escouta fasiéu semblant:
Amirave i rai de la luno,
Tout tremoulant,
Ma grando bruno.

Aro me counèis plus! Tout part,
Lou cor, la tèsto, tout òublido.
Lou mounde es uno traito mar
Ounte se baloto la vido!
Anen, moun cor, assolo-te,
Te rèsto enca la bloundo luno
Pèr charra de
Ta grando bruno.

O luno, astre dis amourous,
Tu que recounèis tout lou mounde,
De tu, de tu que siéu jalous!
Oh! coume tu que noun l'inounde!
Quand vai cerca dins si ridèu
La som, soulet un clar de luno
A pèr mantèu
Ma grando bruno!

A-N-UNO MIGNOTO CANTINIERO

La plus mortal qu'en mon sia...

MATFRE ERMENGAUD.
Breviàri d'amor.

Damiseleto, ah! pos cerca,
N'en pos cerca de boutiheto;
Ah! cerco mai, ah! cerco enca,
Trouvaras rèn, damiseleto.

E la set me vai desseca;
Mai pas uno soulo etiqueto
Moustraras que posque estanca
La set qu'enfloco mi bouqueto... .

Vai cerques plus sus ti raioun,
Ço que voudrié noun es en vèndo
E se béu entre dous poutoun;

Iéu la vese aquelo bevèndo
E m'envau sènso la tasta...
O chato, ai set de ta bèuta!

II

Pichoto fado, es ambrousìo
La pouisoun que vejo ta man!
En tu bevèn la pouësìo
Quand tremoulet te countemplan.

E d'aquéu tèms, O jouino fiho,
Noste vèire se vuejo plan;
Dòu mai restan d'estre à la lio
Dòu mai vesèn toun biais galant.

Leissant la liquour au vulgàri,
Nàutri nous rèsto rèn au goust
De toun abéure melicous;

Mai au cor gardan un esglàri?
De tis iue, bèuta nouvelàri,
Gardan au cor lou fiò tant dous!

A-N-UNO ITALIANO

*Quar nuhls hom
De vos lauzar nos deu traire,
Cum sos sens mielhs l'aparelha,
Romans o lenga latina.*

PÈIRE DE COABIAC

Se vouliés èstre prouvençalo
Eici veiriés un italian,
Alor, tòuti dous fugirian;

L'Amour nous prestarié sis alo,
E bèn luen, nous enanarian
Se vouliés èstre prouvençalo

Tòuti mi cant te dounariéu,
Dins lou maubre te taiariéu,
E ta figuro celestialo
Sus la telo la pintariéu
Se vouliés èstre prouvençalo

Toumbarien Petrarco e Pugèt,
Lou Tician e si bèu sujet:
Coume lou perfum que s'eisalo
S'esvalirien à mi prougèt
Se vouliés èstre prouvençalo .

Mirèio, Lauro e Beatris
N'aurien pas de vers plus requist;
A mis iue n'auriés pas d'egalo,
Sariés la rèino dóu païs
Se vouliés èstre prouvençalo
Vai, sabèn eici vòsti cant
E sus un èr napoullitan
Fariéu nosto cansoun nouvialo,
E tu, respoundriés quatecant,
Se vouliés èstre prouvençalo,
Tu respoundriés alor: — Jouvènt,
Vaqui moun aneloun; ensèn
Fugen la terro ount se rebalo
La glòri e travessen li vènt. »
Se vouliés èstre prouvençalo.

Dintre moun cor retrouvariés
Toun Vesùvi e l'ameisariés
Emé ti lagremo argentalo,
Tant de plagne me jujariés
Se vouliés èstre prouvençalo.

Retrouvariés ta bluio mar,
Retrouvariés toun cèu tant clar,
E li dòuci niue que se chalo,
E toun soulèu que traïs si dard
Se vouliés èstre prouvençalo.

Lou far -niente pròchi de iéu
Te sarié bèn mai agradiéu:
Te bressarien milo cigalo,
E sus moun cor t'endourmiriéu,
Se vouliés èstre prouvençalo.

Eici dóu brès noun se languis:
Soun parié nòsti dous païs
E Roumo es nosto capitulo;
Avèn lou meme paraulis
Lis italian, li prouvençalo.

A L 'AMIGO QU'AI ENTRE-VISTO

*D'aquest segle flac, plen de marrimen
S'amors s'en vai, son joi tenh mensongier*

BERTRAND DE BORN.

Dins aquéu bèu païs, soulèu dóu mounde eutié,
Dequé i'a de verai? Eu qu'esclairo lou mounde,
Se n'avié si bijou t, si diamant, se n'avié
Aquéu lum faus sarié de tenèbre un abounde.

Aro qu'en plen Miejour dins li rai pur m'escounde,
Delicious Aliscamp, supèrbi Tèularié,
Poumpous Palais-Reiau, galanto Aranjarié,
Sias dins moun esperit un rèn que se counfounde

Moun souveni vers vous passo, amiro e s'envai,
E di revoulucioun sias la jougaio, mai
Urous aquéu qu'a vist briha'no estello sauro

Dins voste fiermamen, e l'òublidanço s'ai
Pèr li causo de fum, dintre moun cor s'enauro
Toun image inmourtalo, o douço, o gènto Lauro!

A-N-UNO PARISENCO

*Je vous envoie un petit bouquet
de Myosotis du Bois de Boulogne,
de la cascade même. Vous la rappelez-vous ... ?*

O gènto amigo, me mandas
Aquéli flour de souvenènço
E d'enterin me demandas
Se me souvène? Oh! noun, l'absènço

Noun pòu escafa de moun cor
Tant urous tèms, tant siavo-vido.
Ai de tout acò lou record,
O Boulogno! o lèio benido!

De la Cascado, ounte toui dous
Nous pausavian di courrentiho,
Ai lou cascarelun tant dous
Que gaudis enca mis auriho.

E vese enca lis aucelet,
Nous ensignant long di pradello,
Lou draiòu fres e verdoulet
dou gènt castèu de Bagatello.

E dins vòsti pichòti flour
Recounèisse l'òudour suavo
Di mai perfuma de mi jour,
Ounte tout afan s'ignouravo.

Car d'aquéu tèms, souto moun bras,
Aviéu uno amigo fidèlo;
Aviéu uno paire qu'eilabas
Esperavo de mi nouvello!

CANSOUN

*J'aloie l'autrier errant
Sans compaignons,
Sor mon palefroi pensant
Afaire une chanson...*

THIBAUT IV.

Lou jour qu'esquiho
Tant vitamen,
Jamai, o mio,
Ansin vous ven:
— Eila'n cantaire
Pèr tu, pecaire!
De plour dèu traire
De languimen.

Voste cor tèndre
Adounc, dequ'a
Pèr noun entèndre
Un cor touca ?
O damisello,
Sias uno estello
Que, quand se vèlo,
L'on amo enca.

D'entre li nivo
Mandas-me 'n rai
Qu'embrace, o divo,
Moun garagai;
D'entre l'espaci
Moustras la graci
De vosto faci,
E reviéurai.

La niue que toumbo
Fai plaço au jour,
I'a que la toumbo
D'etérne ahour:

Aro es la vido
Que nous counvido,
E vous, poulido,
Couchas l'error.

Ah! pèr quau canto
Triste es segur
De vèire entanto
Regna l'escur.
Lou piferaro
'mé sa guitarro
Eu comto encaro
Sòu e bonur.

Iéu, la zambougno
Sènso cansoun
Me fai vergouugno
E 'mé resoun:
Es fio sèns flamo,
Fourréu sèns l'amo,
E vous sias l'amo
De moun viòuloun

Noun sias pas sènso
Counèisse un pau
De la Prouvènço
Li prouvençau:
Fau- ti vous dire
Qu'es soun martire
S'an pa 'n sourrire
E 'n bon cigau?

Or, o chatouno,
En vous i' a tout,
Bon vin qu'entouuno
E rire atout:
Voste ine que brulo
Es vin qu'embulo,
E n' en barrulo
Lou troubadou;

Vosto bouqueto
Es uno flour
Que fai ligueto
Au diéu Amour.
Bouquet de joio,
Courau, beloio
Ounte pren voio
La bono imour.

Mai coume l'astre
Qu'ennivouli
Quauque pilastre
Dòu cèu poulit,
Vuei escoundudo,
S'à ma perdudo
Dounas pa 'judo
Tout vai pali!

SOUTO UN RETRA

E no sai qu'ieu m'anes al re contan.....

RIMBAUT D'AURENJO

Ansin, d'abord qu'à mis auriho
Ai de ta voues toujour lou dous murmur
Qu'ai sus mi labro, emé ti poutoun pur,
 Un pau de toun cor, jouino fiho;
Aro, davans mis iue toujour aurai
 Ta douço fàci,
Ta douço caro au mitan de sa graci
 Coume lou soulèu dins si rai!

ESTRENO

à-n-uno gènto Gascouno.

*Ieu ai en cor
Que per demor,
Ni per rire ni per jogar,
Non diga huei
Mal ni envei...*

PEIRE CARDINAU.

Sarien encaro mai galant
Li coumplimen que noun vous mande,
Que vuei es lou premié de l'an:
I'a que l'usage que coumande.

Tambèn vous dise rèn, nimai
Vous mandarai pas ma poutouno,
Prefère ana iéu-meme en Mai
Beisa vòsti gauto redouno.

Pamens vous mande de-matin
Pèr vòstis estreno, mignoto,
Lou bèu libre de Jansemin,
Vous qu'amás tant li papihoto!

EN ESPERANT LA LUNO

*Aquest amors me fier tan gen :
Al cor d'una doussa sabor,
Cen vetz muer lo jorn de dolor .
E reviu de joy autres cen.*

BERNAT DE VENTADOUR.

Dequé t'arribo, o douço luno,
Aquesto niue? Coume ma bruno
 La poudrai vèire sènso tu?
Sus moun balen coume badaie!
 E pas un soulet rai que raie
Dins moun paure cor esperdu.

O blanco fado, lis estello
Se languisson, car sies la bello,
 La bello rèino de la court,
E quand i' a pas la segnouesso,
 Lou palais devèn de tristesso
Lou castelas sevère e sour...

Mai sabes pas que toun absènço
 Coume is estello me fai sènso
 Espèr langui de ma bèuta ?
Sabes pas qu'ame uno chatouno,
 E qu'es tu que dins lis androuno
 Me la menes sèns t'en douta?

Autant que sies bloundo, es bruneto
Autant que sies grando, es naneto;
Autant que sies douço, elo autant
 Me brulo emé sis iue de flamo;
Se toun lum refresco moun amo,
 Si bais inoundon mi vint an.

E coume au cèu dien lis estello:
— Ounte es dounc nosto reginello
 Emé soun mantèu diamantin ?

Dins li lèio li margarido
Dison: — Ounte es la plus poulido,
Nosto divesso dóu jardin?

Ah! tout-escas darrié la colo,
Encentura dins sa taiolo
De fiò, lou soulèu a vira.
O luno, o luno, o bello luno,
De poutouno n'as pas proun d'uno,
De dos, de tres? Vas ignoura

Que n'i'a que t'espèron pèr faire
Ço qu'as fa' mé toun calignaire?
E, coume se n'èro pas tu,
Vas arriba dóu las countràri
Ounte as leissa, sutra soun càrri,
Toun amant d'amour estendu! . . .

Teisas-vous, roussignòu, reineto,
Istas siau, fuoio sout l'aureto,
Ai entendu dins lou camin
Un brut de rauto que m'encanto:
Es elo que sa voues galanto
Au cor me douno lou fremin.

Enauro-te, luno amourouso,
Oh! que l'andano èi souloumbrouso
Es elo? A tant pòu de l'escur!
Mounto, que te regarde, o luno,
Dins la bloundo cerque la bruno
E dins la bruno lou bonur!

PRIMOVÈRO

*E volrai dir
Senes mentir
E comtarai de ta faison.*

GIRAUD DE CABREIRA.

Ai vist leva lou soulèu,
Ai vist parèisse la luno,
Naisse lis estello au cèu.
Mai rèn me sèmblo tant bèu
Que quand pounchejo ma bruno.

Ai ausi lou cant sutieu
Dis aucèu dins li pradello,
Ai ausi l'aire di riéu.
Mai rèn es tant dous pèr iéu
Coume la voues de ma bello.

Dins li jardin plen de flour
Ai begu l'alen di roso,
En m'enebriant de sentour. . .
Mai rèn vèn à la frescour
Di poutoune de ma Roso.

BELLO NIUE

*Mon cors s'alegr' e s'esjau
Per lo gentil temps suau.*

PÈIRE VIDAU.

Negro es la niue, vène mignoto,
Ti péu soun negre e vole iéu
Beisa lou grand mantèu di niué.
Sus ta tèsto bruno, o pichoto,
Vole beisa li nègri niué!

Pamens, au founs de la niue negro,
Dos estello mounton plan-plan..
Vole beisa tant bèu diamant.
Sus tis iue clar, chatouno alègro,
Vole beisa li dous diamant!

Mai à-cha-pau la luno escalo:
Lou cèu sèmblo un bouquet de flour!
Vole beisa chasco coulour.
Sus ta bouqueto celestialo
Vole beisa lou cèu en flour!

A MA FEMO

Auto-da-fe.

Lou pouèto a de pantai,
Fai de vers à tutto eisservo,
Dis à la princesso: — t'ai,
I rèino: tu sèns reservo.

Souvent pèr un mot que n'a
Pas l'oumbro d'uno pourtado,
Lou pouèto vai trena
Madrigau pèr banastado.

O bèn pèr un dous regard
Manda pèr uno caludo,
Lou pouèto, sèmple larg,
Canto dous mes d'abítudo.

Mai lou bout arribo en tout,
E la fin courouno l'obro,
En cantant, lou trouhadou
De tutto verita s'obro.

Em'acò, d'un grand amour
Sènt l'encèndi que s'atuvo,
Que mete tout en coumbour
Dins si larvo de Vesuvo.

Femo, as vist aquéli cant?
N'i'a d'arnourous, n'i'a de mato,
Gardo pèr tu li plus sant:
Aquéli an toun noum pèr dato.

Dins l'encèndi de moun cor
Lou rèsto à ti pèd se cremo,
Ves, en l'èr la pousso d'or
Que s'envolo, o femo! o femo!

III

EN PLEN SOULÈU

A MA SORRE

Ma sorre, aqueste libre es à tu que lou doun.
Es plen d'aquéu bonur qu'en pouèto poutoune:

La vido en plen soulèu!

La vido dòumaci coulo drudo en moun amo
E lou soulèu, veiras coume toujour aflamo
Aquéli gai tablèu!

Aquéli gai tablèu!... Ah! lou sabes, ma sorre,
N' i' aguè de ben amar e n'i' agué de bèn orre
Autre-tèms à l'oustau...

Un paire que s'envai aqui moullte es la maire,
Dous ourfanèu restant emé soun cor amaire
Au mitan de catau!

Au mitau de catau que nous martirisèron,
Que dóu Criste mourènt en jusiòu partejeron
Li vestimen au sort;
Que nous aurien vougu vèire, nàutri li mèstre ,
A milo iègo luen dóu Calvàri, o bèn èstre
Coume noste Diéu mort!

Coume noste Diéu mort segur en aquelo ouro,
En aquéli moumen terrible ounte se plouro,
Urous sarian esta;
Mai noun, nous falié viéure: erian trop jouine encaro
Pèr mouri sèns soufrènço e 'rian necite, o caro ,
A la grand verita.

Ah! la grand verita pau-à-pau se fai plaço,
Quau pourrié preferi la negro tartarasso
Au tourtourèu tout blanc?
Enterin que, vendu, jouga de tutto sorto,
Plouravian tóuti dous nòstis afecioun Morto,
La man dintre la man,

La man dintre la man la Muso èro à moun czaire
E pas un soulet cop me souspirè: — pecaire!
Qu'i feble soul se dis;

Ne plagnè pas, dins iéu boufè li souleiado:
De luen en luen moun amo èro escarrabihado
E moun cor cantadis.

E moun cor cantadis, de toun amo coumpagno ,
Te porge li vers que charmèron sa magagno.
Ah! lou soulèu rènd fort!
O ma sorre, emé iéu vène aqui mounte briho
Lou païs dóu soulas, la caudo pouësio,
Ah! vène is isclo d'or!

LI VERS

A William- C. Bonaparte-Wyse.

Lou pouèto es un jas que mino
Quand s'aprèsto à bandi si cant;
Lou pouèto, acò se devino
Coume se devino un voulcan.

I'aribo pièi qu'a si tempouro:
L'Etna toujour noun restountis...
E lou pouèto ris e plouro,
E lou pouèto plouro e ris.

De soun cor traïs pas que de flamo,
De plour largo pièi de tourrènt
Coume se vèi, quand l'Etna bramo,
Raia l'aigo caudo à courrènt.

Aquelo flamado, aquelo aigo,
Cremant e negant l'univers,
Dòu cor aquéu sadou qu'embriaigo,
Acò's li vers, acò's li vers!

SOULEIADO

A Pau Areno.

A la mar lindo e risouleto
A pres lou blu clar de sis iue,
Blu tèndre coume auro mouleto,
Blu clar coume li clàri niue;

Au soulèu que sa flamo espousco
A pres li raioun de si péu,
Sa tèsto bloundo rendrié fousco
L'estello qu'enlusis li niéu;

E pièi quand lou soulèu davalо,
Leissant soun fiò dessus li mount,
Pèr sa caro, is isclo pourpalo,
A pres li coulour dóu tremount.

E iéu l'amire, e iéu la bèle
En countemplant la bluio mar,
En countemplant l'astre fidèle
Qu'esclairo Crino vers lou tard.

O mar, sout li poutoun de l'auro
Pos trebla toun celèste azur;
Pòu s'esvali ta como sauro,
Soulèu; mount, fasès-vous escur!

N'es plus tèms: quaucarèn mai briho ,
Astre que nous abro bèn lèu...
Tis iue, ti péu, ta caro, o fiho,
Me leisson un cop de soulèu!

LA LIOUNO

A Louis Roumiéux

*Ah! que li pantai d'aqué́l age
Dins la malancounié fan gau!
Fan de-longo rire li sage,
De-fes ploura li fouligaud!..*

A. MATHIÉU.

Amaga dins mi pensamen
Me crese fou i'a de moumen;
Ai d'ideio, o, d'idèio folo!
E moun pantai esvanesi,
Moun cor, liogo de n'en fresi,
Dins sa foulié tournamai volo

Oh! qu'es dous, qu'es dous un pantai!
Franquissès milo garagai;
Qu'es dous, même dins soun foulige,
Trounas amoundaut sus li piue,
Dins l'inmènse perdès lis iue,
Vous enauras sus lis aurige!

Amaga dins mi pensamen
Me crese fòu i'a de moumen.
Alor moun amour sènso esplico
Me trasporto au travès dis èr,
Dins de cauno, dins de desert,
E pamens noun siéu en Africo.

Dins ma patrio siéu que plus
Car tout me parlo: de trelus
Lou soulèu inoundo ma caro;
D'auro chasque perfum beni
Me boufo au cor un souveni...
Espère aquelo que m'es caro.

Amaga dins mi pensamen
Me crese fòu i'a de moumen
Or, sabes-ti quau moun cor bèlo?
E tu, Vidau l'aloubati,
Vulgàri fòu, lou sabes-ti?
Uno liouno grando e bello!...

O liouno de mi pantai!
O liouno, quouro poudrai
De ma man flateja ta fàci?
Quouro, o liouno de moun cor,
Vendra ta vestiduro d'or
A moun èstre apoundre ta gràci?

Amaga dins mi pensamen
Me crese fòu i'a de moumen...
La vese e noun pode la tène,
O noblo rèino, arrèsto-te,
Fiero princesso, escouto-me,
O moun ourguei, te sone, vène.

Siéu trop grelin pèr tu belèu,
Tu cregnes rèn e lou soulèu
As sus la tèsto pèr courouno.
Eh! bèn, toun soulèu es lou miéu
Crègne rèn, te crègne pas iéu,
Pas meme tu, grando liouno!

Amaga dins mi pensamen
Me crese fòu i'a de moumen...
Vole emé tu vèire li cimo,
Piei vole descèndre emé tu
Pèr vèire toun palais perdu,
Ta cauno que rèndes sublimo!

Se me poudiéu faire lioun,
Coume un amant, à douz geinoun,
Te diriéu, o bello mestresso:
— A tu l'empèri, emperairis,
Sus toun mantèu que resplendis
Leisso me pausa 'no caresso...

Amaga dins mi pensamen
Me crese fòu i'a de moumen!
Te diriéu: — Tè, vaqui ma vido;
Tè, fai de iéu ço que voudras;
Tè, de moun cors fai qu'un estras,
Amuso tis ounglo poulido.

Quand me tendriés pèr m'estrassa
Sarian tóuti douz embrassa,
Te sarrariéu sus ma peitrino,
Veiriéu mis iue dedins tis iue..
Oh! pòu ansin veni ma niue,
Amour de mort, o mort divino!

LOU VERAI

A-n-Ourias Jouvau.

Ai legi ti Vint Sounet,
Jouveinet,
E dins toun amo, moun amo
A trouva mémis amour,
Memo ardour,
A trouva li mémi flamo.

Despiéi long-tèms soun uni,
Moun ami,
Nòsti cor pèr la pensado,
Pèr la memo aspiracioun:
Devoucioun
Au Verai, bello uiaussado!

Oh! li draiòu azura!
Oh! li prat
Emé sa tepo verdalo!
Oh! li raioun dóu soulèu
Fort e bèu!
Oh! lis estello argentalo!

Vejaqui li Vrai tresor,
Vaqui l'or
Que lou pouèto demando,
E nòsti Muso, Jouvau,
Dins la vau,
Pèd-descaus, péu en desbrando,

N'an qu'à vougué pèr culi
Li poulit
Bijout de la grand naturo,
E li diamant, li rubis,
Li lapis,
lé fan lèu atrencaduro.

Oh! li bòumiano que soun,
De cansoun
An si joio e si martire,
E se se taison, souvènt
Es qu'un rèn
Lis enclaus dins lou delire!

Au diàussi lou Cènt-pèr-cènt;
Innnoucènt
Quau escomto la matèri!
Capoun quau vèi de miliard
Dins un liard,
Car veira lèu la misèri!

Nàutri, noun nous viro acò
Lou cocò,
Sian riche que pèr la rimo,
E se sautan un bèu jour,
Es l'amour
Que nous fai faire l'artimo!

Ah! garden l'art dóu Verai ;
Di san rai
Que sèmpre nòsti vers lengon,
E Rostchild e coumpagnié
Digo-ié,
Ami, digo-ié que vengon!

LI MARINIÉ

CANSOUN DI FELIBRE DE LA MAR

A Marius Bourrelly.

I

La mar es bello!

Venès, o Marinié!
Que lis estello
Nous vegon matinié!
La marinado
Trefoulis au councert
Que la manado
Di sereno a dubert.

II

De pertout gisclo
De cant patriouti;
Enjusqu’is isclo
Li faren resclanti.
Emé l’ensegne
Qu’aven à nosto pro,
Res pòu rèn cregne
Dis estèu e di ro.

III

Sus nosto telo
La Prouvènço fai jour,
E nosto velo
Es regounflo d amour!
Coume sant Pèire,
Pescaire e pourtalié,
Fai gau de vèire
Noste double mestié!

IV

Trasén dins l'oundo
Noste fielat, e lèu,
Lou pèis aboundo
Dintre neste batèu!
Dóu Felibrige
Tenèn ferme la clau:
Se vèn l'aurige
Barrarèn li pourtau.

V

Fiéu de Marsiho,
Sus lou pitre pourtan
L'umblo caciò
Qu'es la flour dóu fihan;
E, gai e libre
Coume la grando mar,
Au luen, Felibre,
Pourstan aut l'estandart.

VI

E pèr cop-d'astre,
S'un marrit fraire, un jour,
Dins neste encastre
Negavo sis amour...
Toumple superbe,
Toun sen, sout lou maudi,
Que s'entre-duerbe
E sigue aproufoundi!

LI MOUNDAIRE

A LA MEMÒRI DE LOUIS ASTOUIN Pouèto-portofais, encian deputat.

La caro, dóu soulèu roustdido, long la mar
Vesès-lèi au virant! es de machino umano
Lou blad d'or viro e viro em'afecioun, em'art,
E subran dóu crevèu dins la caisso debano.

En l'èr de pavaioun floutejon: li tartano,
Li vapour auturous que sèmblon de camard
Represènton autant de nacioun abelano
Que pèr nous ajuda doublon cènt cap amar.

Zóu! moundaire, au viraut! à nàutri l'esperanço,
Marsiho es lou pourtau dóu Miejour de la Françò
Li càbri peton-pu sout lou pes di meisoun...

Canton, e lou crevèu ié mantèn la mesuro,
Rison, e la susour nègo mens sa figuro,
E manjaren lou pan dóu rire e di cansoun!

LOU BRANDE DI JOUVÈNT

A Valèri Bernard , pintre e felibre

Vivo li jouine, vivo, vivo
Li jouine estramassaut li nivo
De ço qu'es grand, e bèu, e fort!

Lou soulèu abraso lis ort
Esbarlugant de primovèro,
Zòu! jouvènt, au diàussi la mort!
Lou soulèu abraso la terro,
Aro es la vido, es l'estrambord!

Vivo li jouine, vivo, vivo
Li jouine estramassant li nivo
De ço qu'es bèu, e fort, e grand!

Dins lis esplendour s'aubourant
La jouvènço de rai meisouno,
fan ligueto i soubeiran
Li diadèmo que façouno,
E soun espanta nòsti grand.

Vivo li jouine, vivo. vivo
Li jouine estramassant li nivo
De ço qu'es fort, e grand, e bèu!

O MAZADO, porge-nous lèu
La biero, lou vin e l'absinto
Dins quau atrouves li relèu
De la femo. Estrasso la cinto
De ti dos Venus, clar flambèu!

Vivo li jouine, vivo, vivo
Li jouine estramassant li nivo
De ço qu'es grand, e bèu, e fort

TAIBABDY dira Messidor
E li rapugo souleiouso;
Nous entre-durbira soun cor,
Escrin que li rèino jalouso
Chanjarien contro si tresor!

Vivo li jouine, vivo, viro
Li jouine estramassant li nivo
De ço qu'es bèu, e fort, e grand!

Blaise semenara li gran
De si fraso musicarello
Dins un estile fulgurant;
Dira quauco jouino nouvello
En l'ounour d'un countempouran.

Vivo li jouine, vivo, vivo
Li jouine estramassant li nivo
De ço qu'es fort, e grand, e bèu!

Bernard lou pintourlejaire, éu
Testard e prouvençau, felibre,
Dins sa lengo dóu tron de Diéu
Nous dira coume restan libre
Mau-grat la bavo di catiéu.

Vivo li jouine, vivo, Vivo
Li jouine estramassant li nivo
De ço qu'es grand, e bèu, e fort!

Marin dira l'odo que mor
Lis insultaire de Prouvènço,
E ilns un superbe desbord
Nous dira coume la jouvènço
Se moustrara, li rèire mort!

Vivo li jouine, vivo, vivo
Li jouine estramassant li nivo
De ço qu'es bèu, e fort, e grand!

E VIAN e FERRERO diran:
Lou premié la Cansoun dis auro,
E l'Ouriènt nous esclairant;
E sus Nana, Venus o Lauro
Si Pajo d'Album gensaran.

Vivo li jouine, vivo, vivo
Li jouine estramassant li nivo
De ço qu'es fort, e grand, e bèu!

Lou segound, amaire fidèu
De la paltrio independènto,
Decentralisatour, au cèu
Cridara l'obro resplendènto
De Mistrau, raiounant calèu!

Vivo li jouine, vivo, vivo
Li jouine estramassant li nivo
De ço qu'es grand, e bèu, e fort!

La jouvÈnço bèn gaire dor,
Mai se dor gaire, bèn pantaio;
Dequé soun e l'argènt e l'or
Pròchi soun raive que l'esgaio ? ..
D'un pantai aquest brande sort!

BRINDE

POURTA DINS UN BANQUET D'OME dóu QUÈI.

*A moun paire Francés Astruc,
encian secretàri de la Soucieta di Porto-fais*

Crida: — Vivo lou rèi! aro es uno abitudo,
— Vivo la republico! es uno malautié.
Pamens de resta mut, ami, noun anarié,
Cridarai l'un e l'autre e me farès ajudo.

Cridarai l'un e l'autre, ai di; co qu es bèn mai
Es que m'ajudarès! Escoutas ma paraulo:
Manco pas de coulour autour d'aquesto taulo,
Iéu vole li coundonfondre e resta dins lou vrai.

La Republico à nautre es Cerès, bello bloundo
Que noun sourris de luen eu travessant lis oundo
Sa courouno n'es pa'n bounet taca de sang
Es d'espigo daurado, es la vido: es lou pan.

Lou Rèi à nautre es pas un ome que se gounflo
Dis impost de cadun, e qu après festin rounflo ,
E luen de l'eisila, sian triste quand s'envai,
Car noste brave Rèi à nautre es lou Travai.

Ami, se coume iéu vesès la poulitico,
Ome, se coumprenès ansin l'umanita,
Prendrès lou veire en man e lou farés canta
Pèr noste Rèi ama, pèr nostro Republico!

FREDERI MISTRAU

Sus soun retrà pèr Jacquesson de la Chevreuse dins la CALANCO.

Es iéu, lou plus nanet, que tremole davan
Li gràndis estatuio e li cariatido,
Que vous presentarai (fourtuno benesido!)
Lou cepoun que soustèn lou mounumen rouman.

MISTRAU! Salut au Mèstre! Ah! li nacioun avido
I revandicacioun sèmpre picon di man.
Dins sis iue regardas aquéu rire d'amant
Pèr sa patrio, pèr sa Prouvènço escarrido.

Dins lou cèu miejournau a fa giscla soun cor,
E 'no coustelacioun briho: LIS ISCLO D'OR,
MIRÈIO, CALENDAU, LOU TRESOR, tout s'envolo,

E la Franço emé nautre a n patrioto atout
Car se MISTRAU pèr nautre es lou grand troutadou,
Elo dóu grand francés a lou TAMBOUR D'ARCOLO!

A Mlle LEOUNTINO GOIRAND

Ah! bèn urous quau s'envai lèu!
Avès dis, douço felibresso.
Jamai, jamai tant d'amaresso
S'es visto au roussignòu que bresso
Lou vèspre au tremount dóu soulèu.

Moun cor, à vosto noto tristo,
S'es mes à ploura d'escoundoun,
E se vous lou dise, perdoun!
Perqué, moun Dieu, perqué fau dounc ,
Que sèmpre neblés nosto vistos?

Perqué fau-ti, quand lou bèu tèms
Nous vai douna soun fres sourrire,
Qu'ausen çò que venès de dire?
Perqué fau-ti qu'un cor souspire,
Just quand vai souna lou printèms?

Perqué fau-ti qu'à la campano
Qu'anòuncio un batisme eila-Las,
Un autre son se mescle, ai, las!
Perqué s'ausis un sourne glas
Alor que la joio tresano?

Adeja souto li balen
Milo councert fan mereviho
Quand dins lou cèu la luno briho;
Tout çò que dins l'ivèr soumiho
S es reviéuda pèr prendre alen.

Long dis estang, sutre li lono,
Li reineto cantou la niue;
Amount deja sobre li piue
Lou troubadou nègo douz iue
Vers lou castelas de sa dono.

E tout vai canta tournamai
En religant la farandoulo:
Lis aucèu van reprendre en foulò
Si brande à través di piboulo,
En cridant lou bèu mes de Mai.

E, felibresso, felibresso,
Çò que pèr nautre es lou plus bèu ,
Çò que nous es toujour nouvèu
Es Santo-Estello; e si caleu
Emé Mai dounon si caresso!

Quau s'envai lèu es bèn urous!
Dequ'avès di, Madamisello?
Quete es lou mau que vous bourrello,
O lou pantai que vous pivello ?...
Que de fèu dins un cor tant douz! .

Mai, ié pènse: en sounge, pecaire!

Avès belèu vist vosto sor

Au mitan di celestiau cor,

E lou làngui a pres voste cor

Per Antounieto de Bèu caire!

Antounieto, d' eilamoundaut
Entènd vòsti cant, o chatouno ,
E vous mando milo poutouuo,
E li poutoun qu'un ange douno
Soun baume pèr li cor malaut.

Trasès au luen la languitudo,
Prenès voste biais risoulet;
Quau l'amerito, que soulet
Digue di plour lou capelet:
Li lagremo a vous soun trop rudo

Car vous sias un ange divin;
Sias l'ange de la pouësio,
Sias l'ange que nous escandiho,
E, quand bevén à la patrio,
Sabès pourgi voste bon vin.

A1o, qu'es liga di felibre
Lou bouquet di milo coulour,
Que se ié vèi touti li flour,
Vous, roso, mau-grat nòsti plour,
Vous espoussarié l'endoulibre ?...

Tout dis: — Printèms! tout dis: — Cantas!

Aro, dins la naturo entiero,

S'entend de cant e de preiero;

Tout dis soun inne à la lumiero

Que Diéu no us m ando eici-de-bas!

Emé nàutri, Madamisello,

Digas voste cant au soulèu

Que courouno neste tablèu,

E: Ben urous quau s'envai lèu!

Lou digués jamai plus, crudèlo!

A PREPAUS DE L'ODO A PARIS

A Jan Amy, estatuaire.

Ami que luen dóu brès counservas soun balans,
Vautre que d'amoundaut nous cridas: — En avans!

A vòsti fraire de Prouvènço

An demanda de cant pèr Paris ufanous,
E iéu vole avans tout, dins noste parla dous,
De Paris canta la jouvènço.

Quand l'ivèr a fugi, li mount soun tóuti blanc,
L'ivèr sènso respèt viehis li plus gigant,
Mai vèngue abriéu e coume l'oundo
Lou soulèu de pertout gisclo en milié de rai,
E li tèsto qu'iver a bouta dins l'esfrai
De blanco vènon tóuti bloundo!

La jouvènço toujour! la jouvènço pertout!
Que siguen de Paris, que siguen troubadou,
Pèr elo uno nacioun es forto;
La forço es dins l'amour, dins l'amour i'a la fe
Que nous douno à vint an pèr suprème devé
Lou crèis dis esperanço morto!

Despièi qu'ères Luteço, o Paris, dequ' as fa?
Rejouveni sèns pauso es esta toun prefa,
Li siècle passol1 e tu rèstes
L'enfant que l'univers vèn vèire en bailo, e pòu
Tourna l'Alemand que la jalousié rènd fòu,
Dintre toun lustre noun t'arrèstes.

Li boutoun soun flouri, culissen li boutoun;
Que lou Quartié latin tresane de poutoun ..
Murger anan faire lou brande,
Vène que te metren au bèu-mitan dóu round,
I'aura Museto e la beisaras à toun proun....
Que lou Quartié latin s'esbrande!

O Femio, o Mimi, venès vàutri tambèn,
Avèn forço d'amour, encaro un pau d'argènt,
 Venès, mita de nòsti crèire!
Se restan court de pan, manjaren vòsti bais,
Se restan court de vin, béuren voste bèu biais,
 Murger nous prestara soun vèire.

Anaren pièi dansa dins li pradoun tepu:
Do, mi, fa, sol, mi, do, lou refrin esmóugu
 D'aquelo valso plourarello;
E pièi quand saren las dourmiren embrassa,
 E li vièi se déuran embrouanca, pèr passa,
 A nòsti pensado tant bello!

Paris, cap pouderous de tout ço qu'enlusis,
 Fougau de majesta, lou Païs di païs!
 Ti mounumen emai esbrihon,
An tremoula souvènt à la voues di canoun,
 E tis ome souvènt emé si grand renoum
 Quand noun li tuen, li despatrion!

Mai as urousamen, escrin esblèugissènt,
Un jouieu que sara toujour que mai lusènt
 Aquéu jouieu es la Jouinesso,
 E nòsti presidènt, e nòsti deputat
Saran mort qu'ausiren lou mounde repeta
 Musset, Gerard, Murger sèns cesso!

S'ère prince, eilamount, ah! iéu sabe un rousié
 Proche quau passariéu l'estieu mi fantasié,
 Un jardin que tres saut l'emplisson;
L'ivèr retrouvariéu pèr faire moun palais
 Dins la vio Sant-Jaque un oustau que me plais,
 Que mi souvenènço embelisson.

Canten, o mis ami, canten: — Vivo l'amour!
Dedins lou meme got mesclen sourrire e plour
 Coume dins un got cle bouèmo
Mesclon l'aigo e lou vin, segound la lèi dóu tèms:
 Mai aguen sèmpre fe dins l'inmourtau printèms
 Que meno au bout neste pouèmo.

Sènso nous soucita d'ounte boufo lou vènt,
Felibre de Paris, de Prouvènço jouvènt,
Faguen lusi la pegoulado,
Inounden tout pertout emé nòsti caléu:
Quand tout sara bèn mort, restara lou soulèu
Que rèn amosso, cambarado!

Lou soulèu sèmpre jouine enca dira lou noum
D'aquéli qu'i trebau auran jamai di noun
Pèr enaura li causo bello,
E dins si peu de fiò floutejant dins l'azur,
Retrouvaran marca li hais que vuei escur
Largo neste cor que barbèlo.

Ami, vaqui li vers que mande pèr Paris,
Ié cerqués pas d'esprit, es moun cor que li dis.

Enterin que la Joio aciéuno
Quauco odo de mi fraire, à iéu me sufira,
Pèr me faire sourrire e me faire ploura,
Rèn que vosto man dms la miéuno.

31 de Juliet 1879.

LA VALSO

A-n-Aguste Marin.

D'acord li galoubet emé li tambourin,
De la valso disien li premiéri mesuro;
La flamo dins lis iue, li bèlli jouventuro
Cercavon dins lou round si menaire enterin

Un parèu d'un caire s'avanso,
E, se balansant douçamen,
Espèro lou divin moumen
Pèr se gandi de-vers la danso.

Elo, si péu raion, or fin,
Sus si blànquis espalo nuso;

Lou ventoulet, sèmblo, s'amuso
Li mesclant i péu dóu bloundin;

Eu, lou bloundin, fièr juvenome,
Ié sort l'amour de si vistoun;
A soun biais, à soun prim petoun
Dirias verai un gentilome...

Mai lou moumen armounious
Vèn de souna: — jouvènt, jouvènto,
Dins la revoulunado ardènto
Se leisson prène. Tóuti dous

Soun bèu! Sèmblo qu'Amor li bresso;
Enliassa dins lou meme vanc,
Soun plus lóugié que li trevan,
L'es mens l'aulo que li caresso.

Se recounèisson entre cènt
Talamen viron emé graci;
Dous ange partènt dins l'espaci
Podon pas èstre plus plasènt.

Elo, vèn d'apiela sa tèsto
Sus l'espalo de soun ami;
Dins lou chale vai s'endourmi,
Eu, ié dis de causo celèsto.

Que se pòu dire quancl dansas?
Quand voste sen d'un sen se touco,
Qu'avès la bouta bouco à bouco,
Qu'avès la 'bèuta dins li bras?

Eu, parlo; elo, se vèi sourrire.
Que se pòu dire quand dansas?
Qu'avès, pèr marca vòsti pas,
L'armounio, oh! que se pòu dire?

Eu parlo; elo sourris, e piéi
Eu beisso lis iue. De l'amigo,
(Dòu bal noun sai s'es la fatigo)
Sus lou front la roujour parèi...

La musico se fai pichoto:
La valso vai bèn lèu mouri...
Dins un soupir alangouri
Se perdè la darriero noto.

D'acord li galoubet emé li tambourin,
De la valso avien di li darriéri mesuro;
Lou visage enflouca, li bèlli jouventuro
En partènt n'en disien encaro lou refrin.

Li Chastrous, Abriéu 1876

AVANS LA LETRO

Prefaci de PAPIÉ PINTA.

Après que Melisèndo aguè perdu soun bèu,
Aquéu prince de Blaio, aquéu Jaufre Rudèu
Qu'avié passa li mar pèr vèire soun amado,
E qu'en terro proumesso aduguè soun toumbèu,

Se dis qu' 'alor la bello, à noun plus maucourado,
Dins soun vièi castelas pèr toujour estremado,
Sus la sedo broudè lou raconte fidèu
De sis amour, ai! las! tant lèu desesperado.

E sa tapissarié faguè si jour poulit.
Ma Muso, l'autre jour, coume de Tripouli
La coumesso, a pinta soun istòri amourouso

Sus la tapissarié. Que d'ami qu'a canta!
Mai se pòu sus la sedo avé 'no obro courouso:
Ma Muso a soulamen fa de papié pinta.

Ais, Jun 1883.

LA MAR RIS

A-n-Albert Savino.

Coume uno cabro fouligaudo
Cour disaverto; es bon matin,
L'aubo mesclo soun diamantin
A la mar facho d'esmeraudo.
Eilavau, lou fort Sant-Louvis
Sort de Soun sen coume uno estello,
Lou pescaire urous alestis
Si fielat e si canestello.

Coume de pichot gàrri blanc
Que soun lou jouget d 'uno cato,
Dins la luenchour la mar acato
Barco, barquet, batèu galant;
Çai lou ventoulet boufo puro
L'òudour dis augo qu'a rauba

En flourejant la bourdaduro
Resplendissènto dóu riba.

Es l'ouro ounte tout se reviho
Sus la mar; lou cèu es risènt
E counvido à freireja 'nsèn
Lou travai e la pouësio:
E lou pouèto à l'òurizount
Cerco à legi dintre la brèino,
Dóu tèms que dison si cansoun
Li travaiaire de la Sèino.

Pèr la Sèino van s'embarca
Li travaiaire de marino,
Dòu soulèu sout la flamo aurino
Un veissèu nòu vai boulega.
E lou poueto vèi lis erso
Que s'aprèston à batre un ban
Is avans-gardo dóu Coumèrço,
A-n-aquéu pople fièr e grand.

Dòu cèu la mar es lou mirage:
Se Diéu mau-countènt traïs si tron ,
Di bastimen pico lou front
E de l'iro sort lou naufrage.
Mai vuei amount tout es seren,
Tout dèu canta, car l'oundo dindo,
Car sus l'empèri de Sufren
La gràci trauco siavo e lindo.

Vese li ro douçamenet
Sautourleja sus l'aigo claro
Tau que d'enfant que bresso encaro
La maire emé si poutounet;
Vese li roucas fort, sevère,
Dintre l'espèro dóu marin
Qu'à soun pèd vai manda lou ferre:
I'aura pas d'estèu de-matin.

Vese la pas e l'alegrìo.
Lis isclo alin soun touto d'or
E jiton eiça vers lou port
Un rebat d'aubo qu'escandiho;
La mar es vèuso de gabian,
Mai en l'èr milo dindouleto
Passon, repasson, piei s'envan:
An, pèr fugi, coumprés l'aureto

Vese enca, vese lou bonur.
Vese un gros bastimen qu'arribo
E quàsi lest à touca ribo;
Despaciènt, coupant li flot pur,
Dins uno barco un jouvènt remo,
Manjo l'espàci dóu regard...
O dous amour! vese uno femo...
E de poutoun pleno es la mar!

Vese plus rèn, mai bèn entènde
Enjusquo dins moun cor prega,
Dins la countemplacioun nega
Ause tout ço qu'à Diéu se rènde.

E ris la mar de tant d'amour,
E lis oundo en partènt courriolo,
Van dire aquelo bono imour
A l'óurizount, is isclo, i colo!

Touloun, 9 de Nouvèmbre 1878.

GLORIA VICTIS!

D'APRÈS LOU GROUPE EN BROUNZE DE MERCIÉ

Au baroun Carle Tourtouloun.

Glòri au Guerrié toumba sout la forço que primo,
Glòri à-n-éu! De soun sang la Patriò es touto imo
E la Patrio plourara,
E coume lou matin dóu blasin sort la roso ,
Dins lou lustre veiren mounta l'apouteoso
Que di lagremo espelira!

Avié, fiér amourous, uno divo mestresso,
Chasque jour i'óufrissié sa vido e si caresso,
Mai l'infidèlo un jour s'envai
E lou Guerrié mourènt sono en van sa Vitòri,
Quand davans sis iue vei uno femo, la Glòri,
Que ié dis: — Iéu te garirai.

Travessaron li siècle, emé iéu es la vido,
Emé iéu plus se vèi d'infidèlo escarrido,
De iéu te despartiras plus,
De moun empèri entènd crida la Renoumado:
— Ounte es d'aquéu valènt la supèrbi toumbado
Que l'enaure dins lou trelus!

Ah! que n'i'a qu'an vougu me prène pèr lou jougne,
Calignaire feloun que se cresien que jougne
La treitesso emé ma bèuta!
Iéu, moun cor n'es pas mai qu'un mirau de justice,
E pèr gouvèr, ami, n'ai rèn que me regisse
Que l'inmènso Pousterita!

Entre-tèms, la vitòri, entre-tèms la rebello
Emé soun cor vènd soun amour, sa caro bello
 Au Jusiòu, au Turc, à l'Anglés.
Iéu vènde pas, iéu doune à-n-uno soulo raço :
Lou Grand, lou Fier soulet me poutounon la faço
 Iéu moun amour a ges de pres.

Ve, ta maire amoundaut qu'aplaudis ti gème;
Ause de cènt nacioun li picamen suprème
 Coume un largue de profundis;
Ti nemi meme an pòu de ta noblo desfacho,
E courron esperdu pèr se gara la facho
 De toun soulèu que resplendis!

Toun soulèu resplendis, enterin lou vincèire
Qu'a croumpa toun malan s'encour sèns plus rèn vèire
 Que li pople, grand justicié.
E lou remors vendra coume à Judas lou lache,
Demandara la mort en regrettant soun pache,
 Tout atupi de si lausié.

A tu la mort, à tu li porto magnifico
De l'inmortalita: l'amo patrioutico
 Noun creira jamai à ta som;
Persounificaras lou malurous courage,
Empuraras l'amour dóu Païs an jouine age.
 De toun sublime Panteon!

Mai lou Guerrié toumba n'a vist que la vitòri
Fugissènt de sis iue. Sus li mot de la glòri
 Ai! las! sis iue se soun barra;
A vist l'autouno avans de vèire l'espandido,
E quito fieramen aquesto laido vido
 Sènso regrèt, sènso ploura.

Vesès-lou que s'abouro emé sa caro palo,
Pèr noble pedestau de la Glòri a lis alo
 Que l'adurran dins li soulèu;
Dins sa man nervihouso a'ncaro un tros d'espaso
Armo ernbrisado, ome mourènt, sublimo estaso!
 Grando vitimo, grand simbèu!

BRINDE

A Teodor Aubanèu.

Autanèu, mèstre d'amour,
Qu'emé nàutri, dins Marshiho
Voles bèn teni sesiho
Aquest jour,

Noste cor te gramaciò,
Autanèu, mèstre d'amour,
E te pourgen en retour
La cacìo:

De nòsti chato es la flour,
Fai belugueja li ciho,
Car de l'or a la coulour,

Es etèrno soua óudour:
Ansindo es ta pouësìo,
Aubanèu, mèstre d'amour

Febrié 1877

SUS LA DANAE DÓU TICIAN

Au pintre Teo Mayan.

Palais venguè ta tourre, o Danaë, parai?
Lou jour ounte l'amour toumbant plueio daurado,
Pèr la premiero fes faguè lusi soun rai,
Soun rai vouluptuous sus tu, pauro enclastrado.

Subre ta coucho, alor, presso d'un dous esfrai,
Nadant dins lou bonur, ti labro enamourado
Se durbèron au vas l'un mounde plus verai,
E, brihèron tis iue d'uno flamo sacrado.

O Vióulanto, autre divo au mounde mounte sian,
Recebères tambèn ta pluoio e lou Tician
Fuguè toun Jupitèr; sus sa telo amourouso.

Couchè pèr Danaë ta bèuta majestouso,
E si poutoun brulant pèr si pincèu pinta
T'inoundon tant d'amour que d'immortalita!

30 d'Outobre 1877.

ESBLÈUGIMEN

I fraire Chailan.

D'un amour gigant vesès lou tablèu:
La Mar tranquilloso e bello, au Soulèu
Sourris de rubis, d'esmeraudo e lèu

Lou bèle astre mando à la Mar, sa migo,
De poutoun de fiò, qu'en sàuris espigo
Ié van de pertout faire la coutigo,

Pièi s'avanso un pau lou Soulèu, e pièi
Enca'n pau. Dirias quand cerco, un grand rèi,
Pèr se repausa dous sen de vermèi

E sout li poutoun la Mar crido e boundo;
En se trigoussant fai regiscla l'oundo
Que li cuerbe toui dous de dentello bloundo.

Urous, benurous l'artisto qu' alor
Raivo pèr aqui: se gounflo soun cor
De tout belesso. Argènt, diamant, or

Dòu pintre divin dauron la paletto,
Dòu pouèto sant abron l'oudeleto,
Dòu bèu musician enauron l'aleto!

Car lou beisamen de Soulèu e Mar
Douno vido au Gèni en dounant em' art
Lou desir d'ama quicon aut e larg!

Car d'aquéli bais sort vivo esluciado:
Enfanton Camoëns e si Lusiedo,
Ouràci Vernet e sis orro aussado,

Dàvi en Ouriènt cercant lou Desèrt...
E lou Soulèu caufo, e 'mé sis iue verd,
La Mar lou bèle e se tors coume serp.

O GANGUI lusènt, pesco miraclouso!
D'un mèstre, d'un fraire, o pensado blouso!
Fru dòu sen de la giganto amourouso!

Deguères, CHAILAN, èstre esbalausi
Quand dins toun barquet lou lum, à plesi,
Mandè si courau, si toupazo e si

Rebat vermeiau, si raioun de flamo
Sus milo peissoun à 1'escaumo flamo,
Sus cènt biéu raia' sblèugissènt li lamo!

O mèste CHAILAN, à-n-aquéu moumen,
Fuguères l'artisto urous que d'à-ment
Tenié li poutoun qu'amourousamen

Fasié lou Soulèu à la Mar sa bello.
Vaqui d'ounte vèn, que nous desparrello
Toun GANGUI 'mé si coulour clarinello;

Vaqui d'ounte vèn que nous boufo au cor
Uno auro d'amour pèr lou parla d'or,
Dous e bressarèu coume nòsti bord.

MANDADIS

O pious enfant, la plus grando glòri
Es, di Mort sacra d'avé la memòri:
Voste cor l'a messo en un libre flòri,

De si còuquihage, aro a'n bas-relèu
Voste paire, e RAVE aurivelaire, éu
N'a serti li pèiro à cop de soulèu!

26 de Janvié 1882.

L'OUSTAU DE MOUN PAIRE

(Prefaci de LI MEDAIOUN)

Au chivalié de Berluc-Perussis:

Paure paire!... Despièi sèmblo un toumbèu l'oustau...

Autre-tèms, quand la Joio intravo, un verd pourtau,
Passavo, e davans elo uno doublò terrasso
I'òufrissié de sa tèndo uno oumbrino bounasso;
(Souvènt un tambourin crebavo dins sa pèu
De bonur en marcant soun galoi estampèu.)
Un poulit jardinet vèn, depassa li triho.
Es aqui qu'ai culi roso, vers, alegriò
E lagremo, o moun paire!.... Au founs, après di flour
Avé pau-à-cha-pau pres perfum e coulour,
La Joio sus li bord d'uno cascado puro
Se miravo desplèi lou sen à la figuro,
E dins chasque degout de diamant s'ausissié,
Coume un ecò divin, la Joio que risié.

Vis-à-vis: l'oustalet; la taulo toujour messo;
A la taulo toujour la Joio èro mestresso....

Aro au bout dóu jardin l'oustau sèmblo un toumbèu.

Au bout dóu cementèri. Aro plus rèn de bèu.
Coume antan dins li lèio enca flouris la roso,
Mai vuei plus lou diamant cascarelet l'arroso:
Flouris dins li lagremo e nosto amo se dòu,
E nous, sèmblo un plagnun lou cant dóu roussiguòu.
Mai dins lou salounet de l'oustau de moun paire
 Ai uno galarié d'ami, de fièr troubaire,
 D'artisto, e moun soulas briho dins mi tablèu:
 Dins lou jour queto toumbo a pa 'n rai de soulèu!

Villa-Paradis, Jun 1881.

LI DESNARRADO

DE SANT- SAUVAIRE

A Pau Marietoun.

Li Mouro au desbarca
I porto de Marsiho;
Beluguejon si ciho
De raioun enfiouca.
Quant de tèsto van tranca!

Emé la dago en man
Ié fai signe lou capo:
— Zòu! di fiho dóu papo,
Dis, fuguen lis amant,
Jouïssen vuei e deman.

E sa dago a moustra
Uno grand clastro antico;
Di griho li cantico
Vènon de s'enaura.
Li Mouro se ié soun tra.

Davans lou mounastié
Arribon li sóuvage:
Dirias un arrambage
Dins uno broufounié....
Lou porge es lèu plus entié.

L'abadesso, autant-lèu
Qu'a vist li fàci bruno
Emai la miejo-luno
Que marco soun drapèu,
Sé mando sus un coutèu.

Mi fiho, i vierge a fa,
Resten au Sant-Sauvaire,
Siguen pèr nòsti laire
Un degoust rebufa,
Se fai'çò pèr triounfa.

E l'abadesso, ai! las!
(Dison dono Eusebìo)
Davans li sànti fiho
Se fai sauta lou nas...
Grando obro a lou coutelas ,

Car l'eisèmple es segui
Pèr quaranto moungeto.
Si caro poulideto
Pèr quau tant an langui,
Escor aro fan aqui.

Li Mouro soun mounta
En tabasant i porto.
La clastro sèmblo morto,
E n'en soun espanta.
Tant-lèu se soun aplanta ..

De-pertout plòu de sang:
Se Soun moustra li sorre ;
Davans tablèu tant orré
S'enfugisson, leissant
Drapèu, dago sus lou champ.

E l'abadesso alor
Pren la roujo bandiero,
E la bouto i crousiero
En signe d'estrambord.
Lou sang briho au soulèu d'or!

5 de Mai 1883.

?

A mis ami de Four-cauquié.

Pròchi lou soulèu, pròchi Nosto-Damo
Naïsson vòsti cant, o fièr mountagnòu
Au sant recalieu abras vòstis amo
E rendès ansin un vièi païs nòu

Sias dins lou trelus; l'ourizount en flamo
Retrais vòsti Pue, la mar en calamo
Nous mostro à soun tour, dins un mirau fòu
L'ourizount superbe ount lou Bèu se mòu.

Oh! digas-nous tout, trevaire di cimo:
Que vesès d'amount, di lèio sublimo?
Que legissès dins lou cèu prouvencau?

Que dison lis astre? ouate van li nivo?
Quand tout toumbo, un pople ounte es que s'abrivo?
O vautri que sias plus aut que lis Aup!

Janvié 1878.

BRINDE

A la memòri dóu pouèto Fourtunat Chailan.

Autre-tèms, vers Sant-Jan, un fidèu pescadou,
Mau-grat li revoulun e l'ardènto chavano,
E mau-grat lou prougrès , aquelo autre erso umano,
Bravamen emplissié lou gàngui à soun sadou.

Cantavo tout lou jour; sa beto bressarello
Ié dounavo toujour quauque refrin nouvèu,
Lou perfum salabrous e lou rufe soulèu
Ié dounavon de-longo uno cansoun nouvello,

Quand la mar en coulèro un vèspre dóu mau-sort
Chaviré lou barquet... Sant-Jan n'aguè lou làngni,
Mai de l'ennegamen se poutiré lou GANGUI,
La pesco siguè sauvo, e, Chailan siés pas mort!

Avèn lou meme amour: nàutri fasèn la pesco,
Que sian li marinié dóu vièi port de Protis,
Umblamen, après tu, calaren nòsti tis,
Saras nos te soulèu se la mar s'enmouresco.

Cantan dins lou parla que tant t'èro agradiéu,
Au cor nous as grava ta deviso ispirado;
Ausèn enca ta voues de quand s'es escridado:
— La lengo de ma maire es la lengo dei diéu!

Patroun, caminaren soutu ta velo blanco;
Deman repartiren pèr mounte erian aièr,
Mai, vuei, o, leisso-nous, d'aquel ounour trop fièr,
Béure à toun noum dóu tèms que sian dins ta calanco!

Santo-Margarida (Villa Charmerette), 7 d'Abriéu 1878.

SUS UN TROUNG DE CASTAGNIÉ RETRASÈNT UNO POULIMNIO EN BROUNZE

A M. J. P. Goirand, avoucat.

Muso di cant ardènt que canfon la patriò!
Muso de l'estrambord que ti mot soun de tron,
Tu qu'as dis inmourtau empura l'engenò
En fasènt regiscla toun lamp subre soun front,

Que fas sus moun camin? T'aurien, o divo fiho,
Embandido dóu cèu, jalouso de ti son,
Ti sorre? Oh! digo-me, perqué tènes sesiho
Tant luencho de toun Pinde e de ta siavo font? ...

Mai noun, noun, te coumprène: en que te sièr la glòri?
Pèr li grand, pèr li fort acò n'es qu'un pilòri;
Que farien à tis iue lis esplendour dóu cèu?

Ames mies, soulo au mièi de la Pradarié flòri,
Souto un fièr castagnié te rauba dóu soulèu,
E clino, e muto ausi lou canta dis aucèu!

Alès, 18 de Jun 1878.

A L'ITALIO

PÈR L'AVENIMEN D'UMBERT 1e

A J.-B. Gaut

*A tèms o tard fau que dardaie
Lou soulèu de la liberta.*

J. ROUMANIHO

O brès dis art, douço Italio,
Païs paradisen, fougau de laBèuta,
Coume à travès lis an trachis ta pouësìo
Nòsti felen veiran ta grando liberta.

Li rèi emai lis emperaire
S'amosson coume un lum sus quau Diéu a boufa,
Mai quand rèsto de fiéu qu'an li vertu di paire,
Li paire soun pas mort, nimai la liberta.

Ço que fai la forço d'un poble,
Ço que l'enuasso is iue de l'inmortalita,
Ço que n'es lou trelus e lou rènd que mai roble
Es la lengo, es l'amour emé la liberta.

Italio, o, sies inmourtalo!
Dante a ribla ta lengo e Petrarco a canta
Lou cor gounfle d'amour; aro uno man reialo
Vai se leva vers Diéu jurant ta liberta.

O rèi, toun sarramen alegro
Toun pople que saupra lou faire respeta. ..
I parjuro malan! malan i raubo negro
Qu'en te perdènt voudrien perdre la liberta!

Auras, o rèi, à la memento
Ço qu'en plour as ausi pèr tu lou repeta
I fiéu: — La forco d'amo agues e te ramento
L'amour de la Patrio e de la Liberta.

Toun paire èro dins la draloio
Dóu Prougrès lumenous e de l'umanita;
Te n'en lèves jamai, car lou trone tremolo
Quand se forço lou pople à crida: — Liberta!

Sèmpre urouoso, fiho latino,
Dins li siècle à veni, fiero, poudras mounta,
Toun prince agouloupa mita dins soun ermino ,
Mita dins touu drapèu flambant de liberta.

O brès dis art, douço Italiò,
O païs qu'ame tant, fougau de la Bèuta,
Nis redoulènt d'amour, jardin de pouesio,
Nòsti felen veiran ta pleno liberta!

Marsiho.

LI RASIN

A Jòusè Huot

*O bèu soulèu, o fres blasin
Qu'amaduras li rasin!*

LOU RASIN ROUS

Souto lou regard di sauro
Naisse de si pur rebat;
Em'amour vèn me rauba
Moun perfum en passant l'auro.

*O bèu soulèu, o fres blasin
Qu'amaduras li rasin!*

LOU RASIN BLANC

Dins li poutoun dis estello
Ai pres mi rai de diamant,

Trasmete i pàuris amant
Li bais de si vierginello.
O bèu soulèu, o fres blasin
Qu'amaduras li rasin!

LOU RASIN NEGRE

A l'ieu passiouna di bruno
Ai pres la tencho à plesi,
En ié dounant lou desi
Que dins l'espaime s'engruno.

O bèu soulèu, o fres blasin
Qu'amaduras li rasin!

LOU RASIN ROUS

Un flot d'or sèmblo ma grapo;
Sèmblo un vermeiau bouquet
Sèmblo un diadèmo que
De rai uno rèino tapo.

O bèu soulèu, o fres blasin
Qu'amaduras li rasin!

LOU RASIN BLANC

Ma bello grapo argentalo
Es coume un bouquet nouvialo;
Diadèmo fa d'uiau
D'uno courouno nouvialo.

O bou soulèu, o fres blasin
Qu'amaduras li rasin!

LOU RASIN NEGRE

Ma rapugo que negrejo,
Sèmblo un bouquet de secrèt
Que dins soun cor embarrè
La fiho qu'Amour eigurejo.

O bèu soulèu, o fres blasin
Qu'amaduras li rasin!

LOU RASIN ROUS

Soun de fiò mi poulits age,
Quan n'en manjo un, autant-lèu
Manjo un raioun de soulèu
Que douno lou fièr courage.
Quand pièi pèr faire lou vin
Gisclo moun sang dins la tino,
Trovon la forço divino
Emé li poutoun divin!

O bèu soulèu, o fres blasin
Qu'amaduras li rasin!

LOU RASIN BLANC

Mis age soun de poutouno
De la Luno e dóu Soulèu,
E d'amour enébion lèu
Li jouvènt e li chatouno .
Quand pièi pèr faire lou vin
Gisclo moun sang dins la tino,
Trovon lis ouro divino
Que baio l'amour divin!

O bèu soulèu, o fres blasin
Qu'amaduras li rasin!

LOU RASIN NEGRE

Soun mis age: desiranço;
Fam de tóuti li bèuta;
Longo set de voulupta;

Bonur mourtau; óublidanço!...
Quand pièi pèr faire lou vin
Gisclo moun sang dins la tino,
Trovon la foulié divino
E l'enebimen divin!

O bèu soulèu, o fres blasin
Qu'amaduras li rasin!

10 d'Abriéu 1879.

A L'UNIOUN DI FELIBRE

A-n-Achile Mir,

Oh! noun, i'a pas que maître, e brounze, emai frejau
Que fagon mounumen di siècle triounflaire,
Iéu sabe quaucarèn de dous, que vèn d'en aut,
Sublime quaucarèn capable de tout faire.

Es la douço amista, l'unioun que pau-à-pau
Espelisson lou bèu, lou duradis, li fraire;
L'amista que soustèn la nacioun e l'oustau,
E que morgo lou tron, e que morgo l'esclaire.

Pèr qu'un jour verguessian Marsiho esblèugissent
Qu'a faugu? Qu'uno enfant présentasse sa coupo
Pleno de simpatiò à-n-un brave jouvènt...

E iéu ausse moun got pèr béure à nosto troupo ,
S'amadurè soun vin au soulèu qu'esplendis,
Lou meme ounte brihè la coupo de Giptis!

19 de Febrié 1880.

BRINDE A LA COUPO

A Jòusè Roumaniho.

Brinde à la Coupo moudelado
Sus lou sen de la maire amado,
Sen pur, sen au la poulderous
Que l'astre-rèi emé tendresso,
De sa flamo sèmple caresso
Dins soun bèle envanc amourous.

Vaqui la pouocco couloussalo
De la divesso prouençalo.
Faire, mousen- la jusqu'au sang;

Mousen, que jamai sara 'stèrlo:
Chasque degout es uno perlo
De fiò que nous rènd fort e san.

Levant la pampo que lou cuerbe,
Prouvènço, à toun teté superbe
Pause ma bouco e brinde iéu,
Brinde à la Coupo moudelado
Sus lou sen de la maire amado,
Gounflo dòu sang dòu soulèu-diéu!

Per Santo-Estello de 1881.

LOU RÉI BÉU!

Au pintre Eugèni Mayan.

A l'oumbro que sus mar jiton lis isclo d'or,
D'amourous fan pauseto en calignant si bello;
L'oundo de bonur sauto e beiso lis angèlo,
E li poutoun s'envan perfuma chasque hord.

E la PINTURO i bras de mèste Rave dor,
Mayan beiso si pèd, e Regnié si trenello;
La MUSICO à Gozlan dis la Grand bressarello ,
Dóu tèms qu'i Marinié Huot douno l'acord;

La POUESIO plouro à Tavan embrassado,
Mai Chailan la coutigo e la chato ris lèu.
Enterin, amoundaut, lou superbe Soulèu

Se fai porge uno coupo e l'emplis à rasado
De fiò, em' acò pièi, prenènt la coupo en man,
Brindo en l'ounour di bello emai de sis amant!

4 deJun 1882.

LOU VIN D'ALBI

(BRINDE D'UN ABSÈNT)

A Frederi Dounadiéu.

Coume un vas d'Ouriènt brulant
Dintre si flanc milo perfum,
Counforto li cor tremoulant
Nosto Coupo, de près de lun.

Li Latin superbe, à-de-rèng,
Sus si bord, enaurant relèu,
An suça, d'amour calourènt,
Tóuti li veno dóu Soulèu.

Lou vin di papo en Avignoun,
Au pitre bouïènto liquour;
E, dins li ferigoulo, amount,
Lou dis Arquin à Roco-favour;

En Espagno lou vin dóu Cid;
D'en Pèire, au catalan païs;
E, vers li calanco d'eici,
Aquéu de la divo Giptis.

E pèr teni li record fres,
O Coupo, vuei vas dins li cor
Vueja lou sang dis Aubigés,
Sout toun ro, tremolo, o Mount-fort!

Mai 1882

LI CHIVALIÉ DÓU SOULÈU

A M. Aufret Chailan.

Noun sabe quant de tour avié fa lou Soulèu
Dins sis estat. Un jour, lou menèron sis alo,
Pèr la miliemo fes, vers noste brès tant bèu,
E diguè: — I'a qu'acò pièi pèr ma capitalo!

E se faguè de festo e de fiò sout lou cèu;
Marsiho lusiguè d'uno esplendour reialo.
E lou Soulèu diguè: — De nostro court fau lèu
Faireli chivalié; court, n'auras ges d'esgallo

De felibre en cantant passavon vers la mar,
Lou prince lis arrèsto e ié fai: — Ma noublesso
Es trouvado, emé vous plus de long jour amar,

Sarés li chivalié de la Mar, ma mestresso..
E dins la coupo d'or ié servè de soun sang,
E brindèron au prince, au païs, au vin san.

25 de Nouvèmbre 1883.

IV

A JOUR FALI

CANTICO

*A Madamisello Roso G****

Souto la claro niue la naturo s'endor
En largant douçamen uno tèndro preiero
A l'Estre soubeiran que baio li niue d'or
En mandant perabas sa rousenco lumiero,

L'auro e lou roussignòu murmurejon d'acord ;
Lou gribet souloumbrous e la reineto fiero
Fan un duo tant dous que penètro lou cor;
A la tepo lou riéu dis sa cansoun lóugiero;

Lis estello d'amount poutounejon li clar..
O trelus di niuechado! o mirau dous e clar
Que mostres lou bonur dins soun vaste relarg!

S'ausis pièi à travès aquelo serenado
De souspir melicous, de voues afeciounado:
— T'ame, t'ame, o poulit! — T'adore, o bèn-amado!

Abriéu 1881.

LA ROUMANSO DÓU PAURE CHIVALIÉ

A l'esculptaire Zacarié Astruc.

Un troubaire antan partié pèr la guerro,
En quitant sa terro
Avié lou cor plen d'uno ràbi fèro...
A chivau, l'iue sour,
Darrié la mountagno emé lou bèu jour
Eilalin s'encour.

II

E passè de mount, de vau, de ribiero,
E la tèsto fiero
De soun cavalin mesclo sa creniero
A si nègri péu.
La roso s'escound, tremolo lou liéu,
E tout à pòu d'éu.

III

Amourousamen la luno i'espousco
Si poutouno tousco,
E claro se fan lis andano fousco
Quand lanço e blouquié
Pèr-jiton davans lou gènt cavalié
Li rai pèr milié.

IV

— Aparen l'oustau, vivo la patriò!
Fugen li sesiho
Qu'à l'amour fasié nosto pouësio.
Se disié. Subran
Un roussignoulet entameno un cant
Qu'escouto en plourant...

V

— E pamens, pourrié ma pauro amo tristo
Retourna mounte isto
Soun amigo. Oh! sies, patrio, egouïsto.
E lou cavalin
Que lou mors ié dis de vira, malin
Filo soun camin...

VI

— Noun, mouri pèr iéu sèmblo pas de crèire,
En avans, courrière!
Souto l'estandard dóu valènt En Pèire
Anen nous rambla.
E lis esperoun au chivau ribla,
Cauco flour e blad.

VII

Travesso de plant, escalo de colo,
Sa bèsti n'es folo,
Dins l'aire de-fes dirias que s'envolo,
Touco plus lou sòu
E l'aubo eilamount duerb soun pourtissòu
Blanc coume un lançòu.

VIII

— Parèis, o soulèu, vuejo dins moun amo
Toun fiò que tant amo!
Aubo, rèsto tu pròchi de ma damo;
Bresso-la bèn plan,
E reviho-la que quand tremoulant
Tournarai amant.

IX

L'encèndi autant-lèu, darrié la mountagno
Lusis, mounto e gagno
Li piue blanquinèu, e dins la campagno
Lou fiò toumbo dre.

Lou trouhaire vèi alor de Muret
Pourtau e paret...

X

— Vese arrié l'amour, davans iéu la glòri.
Amour tantalòri,
Fas peréu mouri, mai muto es l'istòri.
Malur à Mount-fort!
I crousa malur! Toumbe lou mau-sort
Is ome dóu Nord!

XI

Coume a di, si bras toumbon sus sis anco,
E de sa man blanco
Leisso ana li reno, ai! lou cor ié manco.
Si bèus esperoun
Gardon lis estrié; lou chivau n'a proun
E s'aplanto round. .

XII

— Perdouno moun Diéu, noun siéu un rebelle,
Me sabes fidèle,
Mai perqué moun cor fau que se rapelle
Tant dóuci cansoun? . .
A iéu l'amour soul, à iéu la tensoun,
Encaro un poutoun.

XIII

E repren, lou fòu, soun camin à-rèire,
Deja pòu plus vèire
L'endré valerous qu'enmantello En Pèire
'mé soun estandard;
Mai enjusqu'à-n- éu l'auro porto clar
Li cop di sóudard.

XIV

L'endeman à-niue, l'amourous troubaire
Es luen di chaplaire,

Davans un castèu fai ressouna l'aire:
— Aire plen d'amour,
Porto à moun amanto aquesto rumour
De joio e d'imour;

XV

Digo-ié que mai que jamai l'adore,
E qu'eici demore
Car lou chapladis à moun cor fai orre.
Alor, douçamen
Vèi negreja 'no oumbro avisadamen
Dessus un balen.

XVI

Dins la blanco nine que la luno argènto,
Se destaco, gènto
Uno femo en dòu. L'aureto que vènto
Mens douço es segur
Que sa voues, emai lou cèu es mens pur
Que sis iue d'azur.

XVII

— Coume, adounc ié fai 'quelo voues celèsto,
Ounte avès la tèsto!
Quand tout plouro eici li gràndi batèsto
Que se fan alin,
N'avès pas vergouugno, o paure grelin,
D'estre aqui enterin!

XVIII

Car i'a pa 'n segnour dins lou vesinage
Jouine o vièi, e gage
Que sias lou soulet ome d'aut parage
Que se bate pas...
Mai noun, sias pas noble amor qu'acampas
Ni triounfle o trespass!

XIX

— Que mau me jujas, dono segnouresso,
E que d amaresso
Recorde en guierdoun de ma grand tendresso
Ere parti fòu,
E la provo n'es qu'avias pres lou dòu,
Vesès qu'ai pas pòu. . .

XX

Mai tant fort l'amour es vengu me pougne,
Qu'à la glòri fougne,
Qu'i mort eilavau noun me pode jougne:
Ma felecita
Mes pas de toumba pèr la liberta,
Mai es vous canta.

XXI

— Dounc, voste retour cresès que m'alegre,
Que moun vièsti es negre
Pèr vous, o marrit? Noun, poudès persegre
Uno autre, feloun...
Ai! plouran, diguè 'n quitant lou balcoun,
Lou rèi d Aragoun!

21 de Nouvèmbre 1877.

LOU BRÈS DÓU GIGANT

A Felis Gras.

En roumiéu bèn devot, sus lou plan,Camp-Cabèu ,
Dins la countemplacioun dóu Mèstre subre-bèu,
S èron perdu mis iue vers li luènchi mountagno
Qu'an li nivo à soun front pèr souleto coumpagno

Ero soulèu tremount, e si rai rouginèu,
En picant sus li piue d'aquéli dur mamèu,
Retoumbavon en fiò dins la verdo campagno;
Aurias di qu'un voulcan enlusissié Gadagno.

Subran d'aquel Etna l'esclaire proche iéu
Se tors coume uno serp e porto au founs di niéu
Moun esprit vouladis: lou Ventour se dreissavo

Fièr, trepassant li mount coume un rèi auturous .
Salut! tres fes salut! cridère, o mount urous,
Que dins ti vàsti flanc Reginèu se bressavo!

Avignoun, Mai 1877.

VERS BLANC

Dins un draïòu qu'Abriéu a tapissa de blanc,
Un oustalet s'escound soutu un frais tremoultant
 Is auro perfumado e novo de la primo.
L'aucèu alegramen en desgrunant si rimo,
 Sauto de l'oustalet sus l'amelié flouri.
Tout es blanc : l'aubespín à la primo a sourri,
 E ié leisso beisa sa como inmaculado
Coume avien lis encian segnour de la countrado;
Plus luen es l'òurizount que blanquejo, e lou sòu
 Sèmbla que de Carraro a lou maubra lançòu;
 Amount, lou nivoulan escarraio sa lano,
Dirias qu'uno auto man sus nosto tèsto emplanlo,
 E d'à-rebous, uno mar de la. Tout es blanc,
La terro emai lou cèu, l'aubre emai la flour, franc
L'ousta que soun dedins, pèr l'estro entre-duberto,
 Se vèi tout souloumbrous, e l'òulour de la nerto
 Roufant deforo dins lou councert di blancour,
 Se mesclo desoulado à-n-uno estranjo òulour
 Que la malouro adus, di sesoun inchaiènto.
 Un rebat vergougnous douçamen assavènto
 L'ieu tout espavourdi que retrouvo lou blanc
 Dins lou negre tablèu: es l'ami tremoultant
Qu'à la tèsto dóu lié vous tèn coumpagno e plouro
 De lagremo de fiò jusqu'à la darriero ouro,
 E que, la chambro vuejo, esfoulissa s'encour
 Pèr i pèd d'uu autar mouri dintre si plour...
 E lou lum vergougnous emé respèt caresso
 Un front pale qu'aièr enlusié l'alegresso
 Que se devino vuei dins la flour d'arauglé
Que lou courouno. Oh! mort, que dèu t'estre lòugié
 Toun terrible prefa de-fes! Lou maubre es miste,
 E si dos man d'enfant se sarron sus un criste
 Que l'evòri se perd dins la coulour de nèu
 D'uno raubo en satin facho pèr l'imenèu;
Soun senet, qu'aro un dous paupitamen ié manco
 Dessino artistamen dos belli roso blanco,
 E si dous pèd mignot trapejant li prat fres
 Devien pas escracha quatre flour à la fes!

E iéu, coume lou lum que te viho, estatuio,
Voudriéu beisa toun front, mai toun maubre me tuio,
Toun mautre de sege an pèr la mort esculpta.
E lou passant s'envèn is àutri blanqueta,
Fugis soutu lis auto e vèi sus li tourriho
De l'oustau ounte dor aquelo jouino fiho,
Dos coulouumbo à l'amour s'assajant douçamen
En se poutounejant tendramen, loungamen!

1882

AU COUMANDANT D'ESGRIGNY D'HERVILO

Ce monde est un océan de sympathies dont nous ne buvons qu'une goutte quand nous pourrions en boire des torrents.

LAMARTINE. Le père Dutemps.

De ma zambougno de Prouvènço
Avès trouva l'aire agradiéu;
Nòsti muso an fa cuneissènço,
Vosto liro a canta pèr iéu.

O Pouësio, o douço eissènço
Que d'amista nouses li fiéu!
Endor peréu la mescressènço,
Di pople enehio li catiéu...

Ah! dequ'ai di? Sarié trop bello
L'umanita se lis uman
Sèmpre anavon man dins la man.

Ause la Franço que m'apello:
Se, pouèto, m'avès destriha vòsti cant,
O sóudard, moustras-me vosto espaso fidèlo!

Janvié 1878.

SILÈNCI

A dono Lazarino Daniel.

Quand passavias davans l'oustau,
Toujour quicon vous fasié gau:
Brut d'enfantoun, cansoun dóu paire ;
Cresias d'estre davans un nis,
Tout ço que lou cor rejouïs
Sourtie d'aquéu caire.

Paire, canto; e maire, tu
Bresso; enfantoun, meno de brut.

Toujour de cacalas de rire
Vous arrestavon au lindau,
Aqui tout semblavo vous dire:
Dòu bonur eiçò's lou fougau,
Sian pas riche mai luen dóu mau
L'amour fa 'ublida lou martire.

Paire, canto; e maire, tu
Bresso; enfantoun, meno de brut .

Mai un jour en passant la bresso
S'entendeguè plus creniha;
Plus de cant, mai longui caresso...
Pièi lou curious tout esfraia
N'avié panca di: — deque i'a ?
Qu'ausigué raia l'amaresso...

L'enfantounet èro plu,
Avié 'mpourta cant, rire e brut

21 de Febrié 1878.

AU POUÈTO JOUSÉ AUTRA

APRÈS SA MORT

Quand dins un revoulun suprème, la tempèsto
Souto si mount furious escalant vers lou cèu,
E toumbant rebuta pèr uno man celèsto,
Encadeno un veissèu,

Noun, noun, tout peris pas eilabas dins l'abisme;
Tout s'enmantello pas dintre l'eternita:
La carcasso s'envai, lou soulèu de l'Autisme
Largo pièi sa clarta.

Em' acò, sus li bord de la mar ameisado,
Entre li ro saurin qu'an arresta soun fèu,
Lou pescaire un matin vèi de la travessado,
Li tresor riche e bèu.

A travès li grand marque servirié de courre
Se lou marin ardènt, arriba quàsi au port,
Vesié contro un estèu sa fourtuno s'encourre
En rescountrant la mort?...

Noun, Autran, dins la niue que te traïs uno toumbo
Noun pòu s'aprefoundi ço que souto un cèu blu
Nous as adu de bèu: lou pouèto sucoumbo
Inoudant de belu!

Tu, sies lou fièr veissèu qu'au travès di tempouro,
A li flanc matrassa pèr un tèms ensucant;
Nàutri, li pescadou; quand vèn pièi la bono ,
Nous chalan de ti cant.

Ounour à tu, pouèto! ounour mai à ti soubro!
Mai ounour sobre-tout à nàutri, car se sies
Un pouèto valènt qu'en van la mort recoubro,
Sies tambèn Marsihés!

Sies tambèn un enfant de la ciéuta marino,
Adounc, leisso canta'n felibre de la mar,
Tu, qu'as emé honur sus ta liro divino,
Canta lou toumples amar!

12 de Mars 1877.

LOU NOUVÈ DIS OURFANÈU

A la memòri de ma Maire.

Tout cantavo amoundaut dins lou divin reiaume
D'èr melicous,
Vers nous-autre l'ecò repetavo li saume
Di benurous.
Dedins un brande unen viravon li campano
De la ciéuta,
Disien qu'en aquéu jour, dins uno umblo cabano
Diéu èro na.

De tout caire li cant emplissien li carriero
Pèr faire ensèn
Un galant mescladis de nouvè, de preiero
A l'innoucènt;
Davans lou pastrihoun lou troupèu caminavo
Sus lou coutau,
E pèr festineja lou mounde s'acampavo
Dins sis oustau.

En aquéu jour soulènne ounte tout èro alègre,
Dins un draiòu
Uno chato, un jouvènt, toui dous vesti de negre,
Lou cor en dòu,
Anavon pèr la man, en mesclant si lagremo
E si plagnun,
Car tòuti dous avien meme mau, doulour memo,
Meme amarun.

— O maire, que d'amount veses nosto misèri,
T'amavian tant
Que rèn pòu assoula coume lou cementèri
Ti dous enfant;
Oh! leisso-lèi ploura subre ta toumbo santo
Dóu tèms qu'eila
Lou pople trefouli, se rejouïs e canto
Desalena.

E li dous ourfanèu vers lou cros s'enanavon
Long dóu camin
Li ciprès verdoulet sout l'auro boulegavon,
E d'enterin
Tout cautavo amoundaut dins lou divin reiaume
D'èr melicous;
De-vers éli l'ecò repetavo li saume
Di benurous.

— Maire, regardo-nous dintre la sourno couumbo,
Enfantouuet
Nàutriqu'avian tant pòu, aro sus uno toumbo
Sian tout soulet;
Eici venèn cerca 'n pau de soulas, pecaire!
Sian bèn malaut,
Ai! mando un rai de pas à tis enfant, o maire
D'eilamoundaut!

N'avèn fa que ploura despièi que sies partido
E plouraren,
Oh! vène nous souna de ta voues benesido,
Te seguiren;
Autre-tèms, quand li plour nous venien i parpello,
Em'un poutoun
Li secaves bèn lèu. O nosto maire bello,
Revène dounc!

E tout cantavo amount dins lou divin reiaume:
Diéu èro na,
De-vers éli l'ecò repetavo li saume

De l’Hosanna!
E li dous ourfanèu à geinoun dins la coumbo,
Dóu paradis
Se mescleron au cor en cantant sus la toumbo
De profundis!

Pèr Nouvè de 1875.

ESCRÍ SUS UNO PAJO

DE LA “MIÒUGRANO ENTRE-DUBERTO”

A Teodor Aubanèu.

*Ai vougu soulamen ensigna
lou camin de l’ubre à-n-aquéli que podon avé set*

F. MISTRAU.

Avans-prepaus de la MIOUGRANO.

Aviéu set, siéu ana vers l’ubre,
Li miòugrano escampavon si gran,
Ere jala coume lou maubre
Me siéu amourra dins lou sang.

Ai begu de toun sang, o Mèstre!
Ai lou fiò dins li veno, e moun cor,
Moun paure cor voudrié mai èstre
Mourènt de set e dóu maucor.

Ah! ta bevèndo qu’embriaigo,
Mai qu’avans me leisso maucoura:
Lou fiò s’es amoussa dins l’aigo
Car desempièi fau que ploura!

LA MAR PLOURO

A-n-Aguste Fourès.

Sèmblo que Diéu d'aperamount
Bandis sus la mar sa coulèro;
Lis oundo arribon vers la terro,
Vènon pica li pèd di mount
Largant uno coumplancho féro.

De-fes dirias un dous plagnun;
Dirias l'enfantounet plouraire
Que dins li poutoun de sa maire
Estoufo soun pichot plourun,
Preste à s'endourmi dins un caire

Mai tout-d'un-cop es un crid rau
Coume un gigant que se desolo;
La mar tutto entiero tremolo ,
La mar nuso coume la Crau,
E lou gabian sus lou port volo.

Apereila, lou Castèu-d'I
Sus lis erso dirias que danso;
Li flot sorton d'uno drihanço,
S'entre-tuertron. — Tout es fini,
Disès, lou darrié jour s'avanso!

O pauro mar, dequé t'an fa
Pèr qu'ansindo toun cor desgounfles?
Tu que sus tout sèmpre triounfles,
Res a ta bello liberta,
Vers lis uman perqué dounc rounfles?

Fau que toun mau sigue bèn fort
Pér que souirisses tu, tant forto!
Belèu en plourant de la sorto
Te plagues de toun marrit sort:
Soufri sèns jamai èstre morto!

Car mau-grat tu, mau-grat ti plang,
Es toun destin, sies immourtalo.
Coume Sisife, sèmpre escalo,
Pròchi Diéu enausso-te plan
E dins toun brès subran davalو.

Tout ço qu'es grand pòu pas peri,
O bello mar! e siés immènso...
Mai es ben forto toun óufènso
Qu'un Diéu te leisso ansin soufri
Sènso que touques sa clemènço...

La mar bramo, au luen s'enfugis,
E piei revèn esfoulissado;
Dins lou bram de voues matrassado
L'on destrio: es li negadis.
— Desligues pas nòsti brassado!

Avès ausi lou loup-garou
Que dins la niue traïs soun long gème?
La mar dins un esfors suprème
Aro a quila, sèmblo à soun tout,
Pòu plus crida soun mau estrème.

Es lasso e gemis douçamen,
Plouro bén bas, mai plouro encaro,
Car un pescaire, à pleno caro,
Que de luen la tenié d'à-ment,
A reçu si lagremo amaro...

A-cha-pau lou silènci vèn,
S'entendrié plagne uno tourtouro.
Marinié! veici la bono ouro,
Aro vous poudès fisa 'u vènt,
La mar s'endor après que plouro!

AVANS LOU DARRIÉ POUTOUN

A-n-Ansèume Mathiéu

Elo, de si bèu bras i'encenturo la taio;
Eu, la tèsto à-mita sus soun sen tremoullant,
Bèlo amourousamen lou visage galant
De Madaleno que pantaio. ..

— O douço femo, o tu que l'escrèt bonur raio
De tis iue, chausis-me dins ti poutoun brulant
Lou poutoun de la mort! Mouri sus toun sen blanc
Me sarié la vido veraio!

Elo, muto, sourris e béu sis iue divin...
Tout-d'un cop éu s'escapo à si bras mistoulin:
Moun paire, dis, perdoun! m'as pas manda di nivo

Pér viéure, e vòsti bais, femo, fan inmourtau.
I'a qu'un ome que pòu avé'n poutoun fatau,
M'envau au jardin dis òulivo!

4 de Jun 1879.

MOUN BRINDE

A SANTO-ESTELLO DE 1880

A G. dóu Caire

Pròchi la joio e lou bonur
La peno amaro;
E lou soulèu darrié l'escur
De-fes s'embarro.

Brindas, ami, brindas de cor
A la Prouvènço;
Jouvènt, brindas à l'estrambord
De la jouvènço;

Ami, brindas i Catalan,
Galoio troupo,
Bevès, se vuejo qu'un cop l'an
La santo coupo;

Brindas à tout: à l'aveni,
Au sang ilustre
Qu'avès tòuti rejoueni
'mé voste lustre;

Brindas à tout: is iue cremant
De nòsti chato,
A si labro ounte lou rouman
Met l'escarlato;

Brindas à tout, mai me leissés,
Me leissés béure
A tòuti aquéli qu'an coumprés
Soufri pèr viéure!...

I malurous, is esprouva
De tutto sorto,
De moun cor tant ablasiga
Durbe la porto:

Is amourous endoulouri,
I vièi qu'espèron...
I jouvènt que pèr avé ri
Pièi tant plourèron;

Is, ourfanèu que counsumis
La soulitudo;
I que plouron luen dóu païs
De languitudo

Ausse moun vèire tout en fiò:
Soun béure cremo...
Freiralamen vueje mon got
Plen de lagremo!

PLUEIO

Au marqués Crestian de Vilo-novo

*I'a proun tèms que plòu;
Moun Diéu, ameisas la tempèsto*

L. ROUMIEUX.

I

Ere ageinouia, deforo plòuvié;
De ma maire, ai, las! beisave lou lié:
Enfan, me diguè, dins lou sant reiaume
Sus tu viharai. Adiéu, paure enfant.
E, gounfle, di mort diguère lou saume...
De moun cor plòuvié de perlo de sang.

II

Plòuvié, lou matin que n'ai plus revist
Aqueló qu'aurié fa moun paradis:
Es partido alin, e sèmpre l'espère;
La cerque pertout, d'amount e d'avau;

La cride, quand plòu, sus li piue di serre,
E mescle mi plour i plour celestiau.

III

Desempièi, s'envai de mis iue moun cor;
Pér iéu lou printèms sara dins la mort.
Ai pas couneigu li tèndri poutouno
De maire e d'amigo, e me fau ploura;
Me fau pèr toujour l'ivèr e l'autouno,
E toujour sus iéu la douleur ploura!

Janvié 1877.

AU PAURE RAVE

Pintre prouvençau.

Dins li soulèu, dins lis estello
Preniés li toun de ti pincèu,
E ti suàvi farfantello
Nous fasien pantaiia lou cèu.

Mai tis obro, emé lou sagèu
Dóu Gèni que lis enmantello,
A toun esprit que larg councèu
Sufison plus. Leissès la tèlo.

Au fièr, au fort l'Art grand sourris:
E fugissènt diamant, lapis,
Pale, t'envas souto lis aubre,

Eila dins li champ silencious,
E toun amo em' un suen pious
Vai estudia li sacra maubre!

Sant-Pèire, 30 de Juliet 1882.

VEICI L'AUTOUNO

A-n-Anfos Tavan

Acampen de flour, acampen de fueio,
Li vènt e li plueio
Bèn lèu van veni;
Faguen de bouquet, trenen de courouno:
Vejeici l'autouno
Que dins li jardin vai tout devouri!

Que chasque jouvènt emé sa fiheto,
Au mièti di floureto
Se vague asseta;
Bèn lèu lis aucèu, coucha pèr l'aurasso,
Van leissa la placo;
Si darrié refrin anen escouta.

O pàuri malaut, coume sias de plague!
Pèr vautri me lagne,
O pàuri malaut!
Mai tambèn l'autouno a sis èr de fèsto,
Lou soulèu ié rèsto
Toujour que plus dous, toujour que plus caud.

Amouròusi nine, niue pleno d'estello,
Luno clarinello,
Vendrés tournamai;
Vendrés nous counta li gèntis aubado
Qu'en d'autri countrado
Vous auran canta d'autri mes de mai.

Enfant, lou matin quand sarés pèr orto,
Que li fueio morto
Curbiran lou sòu,
Lis escrachés pas, que vendra, pecaire!
Quauco pauro maire
Pèr garni soun lié, soun lié sèns lançòu.

Enfant, dins la niue quand l'aubre crenihos,
Se vous derrevihos
Un ventas afrous,
Sounjas i pichot, nus e miserable,
Que, tres fes coupable,
An leissa li siéu i pèd d'uno crou;

Sounjas i marin que la mar bacello
Orro e bramarello
Coume un lioun fèr,
I pàuri marin, luen de sa Prouvènço,
Que de sa Durènço
Cercon d'eilalin li bord fres e verd;

Pièi sounjas i mort coucha sout l'erbeto,
Cubert de saureto
De la tèsto i pèd,
I mort embauma de frésqui courouno
Que li vènt d'autouno
Ié van empourta, rauba sèns respèt.

E pregas, pregas, que vosto preiero
De-vers la lumiero
Sara tout-d'un- tèms,
E Diéu, pretouca pèr tant de martire,
Dins un doux sourrire
Nous fara 'ntre-vèire un rai de printèms.

MANDADIS

O moun bèle ami, sublime troubaire,
Que perfumes l'aire
D'Amour e de Plour,

Iéu siéu l'enfantoun que l'autouno esfraio
E tu dins ma draio
Escampes printèms, è soulas, e flour

INCHAIÈNÇO

Au musicaire G. Borel.

*Cœur gonflé d'amertume et qui t'es cru fermé,
Aime et tu renaîtras; fais- toi fleur pour éclore.
Après avoir souffert, il faut souffrir encore;
Il faut aimer sans cesse, après avoir aimé.*

A. DE MUSSET.

D'abord que dins la vido
I'a que souspire e plour
E douleur;
Qu'au matin espandido,
La roso toumbo en fum
A l'oumbrun,
Inchaiènço, inchaiènço,
Lèu vène m'assoula:
Oh! d'amour ma jouvènço
Desmamo-la.

D'abord que la treitesso
Aro dins l'amista
Fai mita,
Que pertout l'on s'atesso
Dintre de poutounas
De Judas,
Inchaiènço, inchaiènço,
Leu vène m'assoula:
Oh! d'ami ma jouvènço
Desmamo-la.

Moun amo pietadouso,
D'abord qu'a vist toujour
La roujour
Sus li caro envejouso;
Qu'es clafi soun camin
De Caïn,
Inchaiènço, inchaiènço,
Lèu vène m'assoula:
De pieta ma jouvènço
Desmamo-la.

Ami, pieta, mestresso,
Leissas-me'sta soulet,
Mi couplet
Volon d'àutri caresso.
Voulas, mi vers, amount;
L'abandon
Es la puro inchaiènço,
Em'elo en liberta
Dins ma pauro jouvènço
Vole canta.

Alin, luen, o ma Muso,
Vène querre la pas
Dins mi bras,
E tu, ma carlamuso,
Digo tis èr gentieu
Emé iéu.
Benurado chaiènço,
Soulas di cor malaut,
Viho sus ma jouvènco
Dintre la vau.

Dins la vau, soulitari
Moun cor tournara mai
Bèn e gai,
Aluencha dis auvàri
Que fan amour, pieta,
Amista.
Vivènt que d'inchaiènço ,
Moun cor vendra seren,
E sara ma jouvénço
Sènso segren.

Moun amo creserello
Noun l'enganaran plu;
De senglut
N'an proun vist mi parpello!
De moun sen lis ami
Soun bandi;
Gramaci itinchaiènço,
Cato-miaulo e jalous
Saran pèr ma Jouvènço
De malurous.

Amour, e tu, pecaire!
Partiras de moun cor?
Oh! la mort
Soulo acò pourrié faire!
Viéurié sènso poutoun ?
Jamai!... Noun!!
Es trop fort, inchaiènço,
E pièi coume òublida
L'amo de ma jouvènço
Que m'a 'nfada!

13 d'Abriéu 1876.

L'EROS DE DIÉU

A Clouvis Hugues

Quand beni pèr lou papo, au noum dóu Diéu vivènt,
Mount-fort, dintre lou sang patouiant jusqu'is anco ,
Fasiès ploure la mort e tenchura li vènt
D'encèndi pèr adurre amount milo amo blanco,

Toun amo l'aviés visto, usurpaire valènt?
Es-ti dis Aubigés que li cresènço franco
Que raubaves? Noun, noun: pèr ta fe tout relènt,
Di segnourié vouliés escala l'auto branco. .

Ah! n'i aguè desempièi de bando de bregand
Lou pougnard au cousta, lou fusiéu sus l'espalo,
Mai avien dóu mestié la counsciènci leialo.

O bourrèu abrama! missiounàri pagau!
Ero tant Innoucènt toun mèstre de cabalo
Que fuguères l'eros dóu Diéu di maufatan!

15 de Nouvèembre 1878.

A DOS VIERGE RAUBADO

A Coustant Hennion

*Alama flac , volpilh de frevol malha,
Ja lo vers Dieus no us aint ni vos valha!*

PAULET DE MARSIHO.

Bràvi sorre Alsaço e Lourreno
Quand i'a trege an, noumbre maudi!
Un ome, noun un laid bandit,
Vous meleguè dins li cadeno

D'aquel autre laire Bismarck;
Quand d'enla cridavas:Venjanço!
O bèlli vierge, e que la Franço
Mas'egavo un verin amar

Quand li nacioun touto souspresso
Regardavon emé d'ieu sour
Ço que se pòu faire en un jour
De dòu, de malur, de treitesso;

Quand lou vièi Moltke dins lou sang
Reniflant, baigna jusqu'is anco,
Bevié la biero bruno e blanco,
A vosto augounio brindant,

Alor, 0 vierge mai-que-bello,
Un prouidge coume n'i'a plus
S'acoumpliguè dins lou trelus
De la Prouvènco encantarello;

Alor dóu levant à l'uba,
Dins la Franço, alin, de tout caire,
Aguènt proun larga si “pecaire”!
S'ageinouiè l'Umanita.

Car Guihèn, pèr si raubatòri
Grandissènt soun païs german,
Grandiguè l'amour dis uman
Pèr vous-àutri dos, o belòri!

8 de Febrié 1883.

A JAN MONNÉ

Ami, moun paire mort te rapelè toun paire
Quand un jour fugiguè de ta noblo afecioun;
Ta maire morto vuei me ramento ma maire
Quand un jour me leissè dins la desoulacioun.

Avian lou meme amour: la memo devoucioun
Nous menè vers lou Bèu, ebri de sis esclaire,
Aro, pèr lou malan plus fort li liame soun
Tóuti douz mai-que-mai nous poudèn dire fraire

D'abord que lou bonur eiça n'es qu'un pantai;
Que paire e maire au cor nous an douna l'esfrai;
Que nòsti cor an tra de lagremo saunouso,

Ami, vers l'Inmourtalo, ah! viren nous toujour,
La Pouësìo soulo es gardo dis amour
E dis ourfanèu parlo is amo benurouso!

20 de Febrié 1884.

FRE

A Madamisello Clara P.

Aquelo niue lou vènt dins lis aubre cridavo,
Lis aucèu esfraia partien coume de fòu;
La luno, eilamoundaut, jalado de la pòu
Darrié si ridèu blanc, mato, s'enmantelavo ..

Urous, aquelo niue semenado de dòu,
Aquéu que dins la som douçamen se bressavo
Iéu, m'endourmère pas car ma pensado anavo
Pertout ounte i'a'n cor que sout la fre s'esmòu.

Pensave à vautre, aucèu tant lòugié sus la terro,
Que retrouvarès plus voste bèu nis ounte èro;
Gemissiéu quand lou vènt vous couchavo d'eila.

E pensave sus-tout à vous, pauro ourfanello,
Que sus la bouco en glas de vosto maire bello,
Cercavias un poutoun pèr voste cor jala!

25 de Nouvèmbre 1877.

L'ENUEI

A Francés Delillo

Coume un divèndre-sant la naturo es en dòu:
Lou cèu es negre amount e jito pèr lou sòu
De sa laido coulour negrasso.
E iéu, estaca'u sòu, ai l'amo que se dòu,
E moun cor de viéure s'lasso.

Un silènci esfraious de terro vers lou cèu
S'estènd, e cerque en van un ramage d'aucèu;
Di mount li sóurnis esquinasso
S'enarcon en prenènt de formo de toumbèu...
E moun cor de viéure s'lasso.

E pènse, e moun esprit, mau-grat moun cor malaut,
Voudrié dins de plasènt souveni pèr-avau
Tournamai reprendre sa plaço;
Mai lou tèms es tant negre e tant prefouns moun mau
Que moun cor de viéure s'lasso.

E pènse entandòumens: — Ounte siés, jouino enfant?
Me respoundras dounc pas, o tu qu'amave tant?
O caro, o douço creaturo!
O tu, qu'as empura la flamo dins moun cor,
Vendras-ti pas un pau ploura subre soun sort,
Pèr amoussa soun fiò ‘ mé ti lagremo puro!

E res que me responde! Ounte es, lou sabe pas.
Alin, entènde un brut: d'un chivau es lou pas ;
Sus lou chivau se vèi un ome; sa barbasso
Es blanco. E, sournaru, fai aquéu cavalié:
—Es iéu que siéu l'Enuei, l'ome de la Foulié,
E quand vesite un cor, de viéure lèu s'lasso.

1877

COUPO D'AMOUR

A Louis Vergno

Plus rèn que li lagremo

R MARCELIN.

I

Coupo de vido e de bonur,
Vuejo la bevèndo à flot pur
Dins moun amo malauto;
Pér abéura l'aucèu plantiéu
Coulo toujour l'aigo dòu riéu.
Fuguères pleno antanpèr iéu,
Tourno enfiouca mi gauto

Coupo d'amour, quand tòuti dous
A-de-rèng, souveni tant dous,
 Trempavian nòsti labro,
Quand embriaga de toun vin,
 Dins un trefoulimen divin,
Nous fasian de poutoun sèns fin,
 Poutoun que l'amour abro;

Coupo de fiò, quand à mis iue,
Esblèugissènto dins la niue,
 Me la moustraves bello,
Quand mai resplendènto que tu,
Subre soun front blanc de vertu
 Vesiéu s'amoussa li belu,
 Li belu dis estello;

E quand pièi lou jour sourrisènt
 Traucavo li nivo adusènt
 I flour sa douço eigagno,
 Nous trouvavo, iéu à geinoun
 Curbènt de bais si blanc petoun,
 Recebènt un darrié poutoun
 De ma tèndro coumpagno..

II

Alor, n'aureu cresu jamai
 Que li belli roso de Mai
 Avien, coupe divino,
Lou ventas que li coucho en fum,
 Que vèn l'escur subre lou lum,
 E que li flour dòu dous perfum
 Venguèsson dins l'espino.

Alor, quand vuejant lou bonur
 Dintre nosto vido d'azur,
 Noun sabiéu, bello coupe,
 Que l'ivèr secant lou ribas,
Chanjavo pièi l'eiguéto en glas,
 E gue touto espigo eiça-bas
 Dauravo pèr la coupe.

III

E moun ivèr aro es vengu,
E de tant d'amour qu'ai begu
En glas aro es lou rèsto,
E Mars noun tournara pèr iéu
Foundre moun sourgènt, ni l'estiéu
Pas un soul rai rendra lou fiéu
A ma coupo de fèsto.

IV

Ma coupo es pleno enjusqu'au bout,
D'un vin que déurai béure tout,
D'un vin qu'en rajant cremo,
Car moun ambrousio d'amour
Qu à douz bevian la niue, lou jour,
En passant subre la doulour
S'es virado en lagremo.

6 de Desèmbre 1875.

LOU DARRIÉ BRANDE

A.F Fertiault.

I

- Anaren plus au bos... L'auro vènto tant forto
Que lou sòu adeja se cuerbe de fueio morto.
O jouvènço, viren, an pas tòuti toumba.
- Dóu brande rèsto enca... quant rèsto encaro à dire?
- Tres couplet. An, viren, i'a 'ncaro de que rire...
- Anaren plus au bos, li lausié soun coupa.

II

- Anaren plus au bos... Leisso que te poutoune,
Marieto, lou vènt, di poutoun que te doune,
Secara proun lou mèu. — Jouvènt, sias arrapa ?

Dóu brande rèsto enca... quant rèsto encaro à dire?
— Dous couplet.— An, viren, i'a 'ncaro de que rire...
— Anaren plus au bos, li lausié soun coupa.

III

— Anaren plus au bos... Se l'autouno, o pourido,
Couchavo de toun cor nòstis amour flourido,
Li fueio en revenènt me retrouvarien pa...
Dóu brande rèsto enca... quant rèsto encaro à dire?
— Un couplet. — An, viren, i a ncaro de que rire...
« Anarerı plus au bos, li lausié soun coupa.

IV

— Anaren plus au bos... O ma douço chatouno!
— Anaren plus au kos... Encaro uno poutouno;
Ai! ai! se lou malur nous anavo acipa.
E 1ou brande es fini; jouvènt, sauten encaro.
Marieto, ta man de la miéu se separo...
— Anaren plus au bos, li lausié soun coupa.

FIN

Tèste integrau

C.I.E.L. d'Oc

Centre International de l'Écrit en Langue d'Oc

Sèti soucian:

3, plaço Joffre - 13130 Berro.

Tóuti dre reserva - Tous droits réservés - All right reserved.

© Centre International de l'Écrit en Langue d'Oc -2000

© Adoubamen dóu tèste, de la meso en pajo
e de la maqueto pèr Tricò Dupuy,
en sa qualita de Direitriço
dóu Counsèu d'Amenistracioun
dóu CIEL d'Oc.

